

國朝常州駢體文錄

國朝常州駢體文錄卷第七目

齊雲山人文三十三首

陽湖洪符孫幼懷

擬連珠二十首

道光鄆陵縣志敘

代

張問西明府日鉏齋日記敘

誦芬堂詩集敘

袁蘭汀松漠紀遊詩敘

程槐伯方雨課耕圖敘

燕臺話別圖敘

跋蔣伯生所藏孫季述先生手札後

與陳春騷書

與蔣子瀟書

約蔣子瀟卜居南山書

與孟孫書

蔣節母誄

弔汪容甫先生文

國朝常州駢體文錄卷第七目

國朝常州駢體文錄卷第七

齊雲山人文

陽湖洪符孫幼懷

擬連珠二十首

蓋聞遠略是務曾無定謀奇術總工究非達識是以鼯鼠
五技焉知巢阿之心鶴鵲一枝安于垂天之翼

蓋聞境無夷險知幾者安才無優劣適用者貴是以以燕
巢幕危于蛟龍之出淵使虎服車不如駑駘之安步

蓋聞物珍于罕則雙至者厭謀集于眾則多助者祥是以
鳥餘九頭雖徒生而何益蟲備百足卽至死而不僵

蓋聞至靜者壽必有物以相容至剛者折必有物以相抵
是以黿首戴石投轄餌而不吞蠹喙貫綃觸蛛絲而卽死
蓋聞障花以錦則人豔其工鎔雪以火則世嗤其拙是以

珠戶日麗久忘衡茅之心蓬闕艸深不知羅綺之色

蓋聞山有珍奇則眾心共赴物似枳棘則獨力可延是以
毳毛可以爲冠而無知之禽反壽檀枝可以藝鼎而不材
之木終全

蓋聞侈服御者難與言理辭之計寶珠玉者不足知安危
之機是以秦鏡雖明無由燭沙邱之尾趙璧縱返不能解
長平之圍

蓋聞以弱遇強則勇夫乏術舍長用短則賢者無功是以
巧能奪天直雷霆而氣阻力可扛鼎驅蠅蚋而技窮

蓋聞不師古訓則詩書可誣不恤人言則聖賢可誣是以
鑠金之口銳于平章之劍鋒澈石之齒厲于鄧侯之刀筆
蓋聞以蠶負山胡不自量以螳拒轍毋乃不祥是以嘯哀
蟻之音不能使巫峽之雲不麗積精衛之木不能使東海

之波不揚

蓋聞安不忘危持之以儉豐不忘約戒之在盈是以以布覆尊鄴鄩之律最古以錦貼地衛霍之家必傾

蓋聞操約望奢以小易大事雖無益報或可徵是以范叔綈袍之情無異以良裘貽孫子卬成分宅之誼必能以廣厦庇雲仍

蓋聞珍異之求物力易盡口體之奉人心無窮是以饌必千蹠而十家之雞不足裘必百腋而一山之狐盡空

蓋聞道有污隆舉前不能定後時有升降泥古無以知今是以受玉南河僅洗巢由之耳承鼎西土乃生管霍之心蓋聞涼風戒秋淒思條入積雨送暑華心易闌是以陽烏在中不銕黍谷之雪候雁一去卽凝榆關之寒

蓋聞人無智愚貧則易守物無貴賤多而不良是以荆楚

雄藩以鸛鵒爲常服毛辭賤士爭雁鷺之餘糧

蓋聞有典而必刪者不根之言似是而實非者無稽之語
是以終軍校雅雖盛傳夫豹文司農說經猶致譏于麟鼓
蓋聞裂網毀紀說則愈奇拔本塞源風以日下是以秦贅
執雁多生戀乎壻鄉荆人攘羊轉恐聞于子舍

蓋聞一代之輔儒而始忠一節之奇媛逾于彥是以刺鳳
之婦獨有當熊之心折鹿之英能求斬馬之劍

蓋聞動植之微有時而貴繫屬之親有時而辱是以辭國
賓客亞于淮南之雞犬齊廷臣僚不如宣囿之麋鹿

道光鄆陵縣志敘代

道光十二年七月知縣侯官何鄂聯續修志成而弁其首
鄆陵爲古邛姓之國始見于春秋外傳後值兼并降國爲
邑周秦之間置場彼此互有攸屬漢魏而後吾圉以固雖

晉宋割據南北轉戰鄢處偏隅傳漢未及至元明季年偶
覲兵燹而樂郊久懷遷流易復加以我國家休養生息
百八十年民生其閒安於耕鑿故閒井恬熙而風土茂美
也夫治澹樸之邑多簿領之暇猶不能延攬川陸博稽輿
地網散逸以紀載集遺間爲一書則守土者之恥矣前知
縣施誠吳堂南士宿學所輯志乘多可據依今參諸二家
折衷求是琢其瑕疵補其闕佚存其攷實之語削其敷腴
之辭又延邑人之耆俊進都鄙之耆長使續陳先德之所
述悉達惇獨之姱行越若干時舊章差集乃授簡友人陽
湖洪君符孫削縣摘簡謝華責實經之以事緯之以言四
月而成援宋人周淙乾道臨安志施宿嘉泰會稽志等例
命之曰道光鄢陵縣志所以尊紀元之義俾後人按其歲
月有所徵信則猶曩哲志也凡圖五表三志八敘錄一次

其篇目如左

規區畫域模畛列畦開方運籌圖經是基端表植槩首經
從緯黃壤錯繡青郊分綺援隋書經籍志載周輿圖例述
輿圖第一

惟初建國安陵置鄉曰屏鄭郊爰啟漢疆降國爲邑附郭
緊望南北兵爭安廬保障援宋周應合景定建康志沿革
表例述沿革表第二

矩漢賢如晦宋傑後有君子是倣是則嘉德旣肇治具
畢張斷獄麗辭克寬克明援唐杜佑通典職官志例述職
官表第三

周典書升漢行義年菁莪在詠勛哉後賢孫寶明經張興
廉讓厥聲英其光我問問援唐選舉志宋選舉格例述選
舉表第四

犬牙錯壤豆剖瓜分兼書鄉聚馬彪是遵流峙旣形延袤
亦盼參乎風土附以物產援漢班固漢書地理志例述地
理志弟五

垣墉旣興版築斯備命彼司里載葺載治豐穰之歲千倉
萬箱爰有餘力迨乎橋梁援明康海武功縣志建置志例
述建置志弟六

勤民之首爰奠厥居編戶計口族黨比閭勤政之首明農
布化稅于桑田信人夙駕援唐杜佑通典引劉秩政典例
述政典志弟七

髦士所蒸靡有頑黷施之原俗教益涪備胡篋秉器玉璫
承流蒨蒨士子經明行修援宋崇寧學校新法志例述學
校志弟八

明禋旣舉嘉薦斯饗山川百神懷柔是掌黍稷匪馨明德

維馨何以格之時和歲成援齊祠廟記例述祠廟志弟九
傳世有文首錄制誥炎炎揮翰盤盤摛藻古石出地英光
燭天抱守孱關附于斯編援唐人麗藻錄例述麗藻志第
十

德成而先藝成而後徧傳前賢爰及耆舊純靜專一儒者
所難女士則之求心之安援明宋濂浦陽人物志例述人
物志弟十一

三千餘年殊罕大事傳聞逸說例得附識五行淑慝偶鍾
一隅休徵咎徵援筆備書援後漢雜事晉朝雜事例述雜
事志弟十二

前人著書敘厥本末集爲一編以則古昔堅白長短詘申
涓滴日平我心無所執持援漢王符潛夫論敘錄例述敘
錄弟十三

張問西明府日鉏齋日記敘

日鉏齋日記四卷續編一卷宛平張問西明府所著也明府少有智珠長傳古尺立言煖乎布帛出語萃其琳瑜以明經出判雄州歷宰劇邑經生之言移而判牘奇士之筆不輟著書暇日徧核羣籍兼綜百家十更締裘三易豪素集眾善之說成一家之言方乎古人無愧作者明府嘗言結繩以後倚杵以前人傳載筆之編家有紀言之冊究之少聞徵信多所傳疑論史則每誤馬肝說經則罕折鹿角原其流弊厥有四焉勤披瑞圖豔說異讖鱣生宋澤魚入王舟感鳴鳥之不聞記祥麟之數至興周則昌戶傳書競言乎赤雀起漢則汾陰有鼎事類乎黃龍僅成媚上之文莫與稱先之旨此則侍中著史首開符瑞之條司農解經兼徵圖緯之說此一弊也侈談內典廣志道流莊子濠梁

任公釣浦城闕之外遇法觀而皆書祠廟之旁有浮屠而必錄甚至三千海若羣驚白馬之濤百二關門徧覩青牛之迹此則魏收列志登釋老以抗儒陸氏音經錄李莊而削孟此一弊也龍盈秦野兔舞周郊神降莘墟鬼謀曹社黃石三略盛言縮地之方鄒衍九州偏利談天之口僅足供乎牙慧何所取乎心儀此則言非有物齊諧志怪之書語出無稽千寶搜神之記此一弊也志存攷核廣事搜羅此之播稱或云彼勝然而張霸僞史別傳泰誓之篇梅賾古文轉拾諸書之唾卜商釋易經再託而益訛端木說詩更數傳而非古較之征南武庫之貯視賈服而多疏會稽聖證之篇闕周秦而創解殆有甚焉此又一弊也是書則立埽羣弊不師一心卻浮誇之說破虛妄之詞選義則信而有徵數典則嚴而不紊本陵虛之才爲實是之學寓信

古之識于闕疑之中又復廣列眾解不遺一長星紀經天
輿紀緯地小學則召陵之書算經則海島之作莫不旁搜
博采鉏重削繁是則積耿耿之照成列宿之光納涓涓之
流爲大河之注者焉況乎江都校經義在圭臬長沙論事
言有準繩傳劉向之五行不背納箴之旨取武成之三策
幾無盡信之書是宜壽之梨棗廣彼楷模義不背于前脩
學有補于後進符孫戊寅之冬依人闕右識君秦中授簡
暇時屬爲之敘雖學愧吟蟲語冰而不可而力追展驥學
步而猶能乃爲述其崖略如右

誦芬堂詩集敘

誦芬堂初集十卷二集六卷永豐郭羽可舍人之所著也
符孫於甲午之歲遇舍人于大梁鄭國半面卽知醴蔑之
心渤海再逢許入韋溫之譜狐貉當御不遺燠于縕袍咸

韶在縣猶賞音于下里士感知已又何可言授簡暇時命
爲之敘竊惟今世操觚之儒各挾紛藻揮翰之士羣趨浣
花卒之優孟入坐空畱孫叔之衣沐猴壓冠益重楚人之
謗夫古今之學杜者夥矣唐有白居易李商隱宋有黃魯
直陸游 國朝有吳偉業朱彝尊然香山則雅澹玉溪則
縟麗山谷則生峭務觀則道上梅邨則以哀豔勝竹垞則
以沈博傳伐昆谿之竹簫竿異音出井陘之師旗鼓各建
者何哉蓋能入彼堂奧而投其心肝非特得諸藩籬而謀
厥面目也舍人少有大志長具軼才性情流於翰墨忠孝
溢于篇什誓心之言不專于文字藉手之報思操乎斧柯
乃黃鍾不鳴轉羨擊缶龍泉在握見屈補履遂并其抑塞
磊落不可一世之氣發而爲詩今觀所作凡梁國思親竟
陵哭姊高岡憶弟東海寄妹文淵戒姪之作陳思贈友之

篇莫不茶餐于心聲動簡外蓼噤厥口哀餘言中至若決
河歎劫鏤冰格神鳬莊術窮鴻摺歌咽常山雜詩之製搢
齊于蓬居寧都樂府之詞痛心于衙蠹則直將許身稷契
以飢溺爲已任致君堯舜敷平章爲世道雖幸逢 清時
頻作上客關山戎馬可謝于酸吟垂老無家不流于怨別
而要與杜陵原頭錦水堂畔如符節之合可揆前後如禮
樂之制不相沿襲非所謂挾其心肝而遺其面目者乎彼
世之刻風鏤月重矩疊規且操筆萬語行于衛霍之家求
人一牋納彼陶頓之室以尺縑爲羔雁等片楮于包苴者
肆其嘈音曾罕肝膈之語侈厥浮響無當風雅之作使讀
舍人之詩夫亦知所警矣符孫幼習詩史壯慚學藪秦關
楚塞徧訪雄奇齊竽晉鼓粗通聲律值宏農之淹雅知元
凱之平生因書僥詞用附傳集或不至搜杞梓者侈言元

漠額荷芰者矣說修陵云爾

袁蘭汀松漠紀遊詩敘

松漠紀遊詩一卷吾友袁君蘭汀客多倫諾爾時所作也
郡割上谷州連廣寧獨石中外山分華夷長城東西地半
人鬼艸染淺碧天浮淺黃積雪石勁遇秋陽而不晞奔風
山頽遘夏日而尤厲種紫圍幄冰猶在須鑪紅鑿池寒尙
徹骨羌笛夜引當夫鼙更胡笳晨鳴代彼虬漏駕言出遊
靡問所適茫茫混混一白萬里怒礫搏頽細逾蟲沙飛塵
襲衣暗過雅陳牧馬悲嘯多于棲峙之雞明駝疾馳傲彼
縛輶之犢危崖獅蹲頻見壓馬奇樹熊立時來攫人凡此
怪偉寓之篇什心勞于思意汨汨而泉湧手倦于寫言冷
冷而湍激是則礪才呼韓之域調高而引商鍊氣歐脫之
鄉聲和而夏石者矣戊子之歲同遊締城授楮當筵屬爲

之敘猥以瀚海十丈記先人之舊遊天山百重讀絕傲之
遺筆極邊春色工寫荒寒斟酌壁牋炙規削簡君原好事
句每成於鞭絲帽影之間僕已倦遊神亦往於白艸黃沙
之境

程槐伯方雨課耕圖敘

程君槐伯寄意林壑棲神煙霞曾購一頃之田于澗水之
上朝聽桑鳩莫策犁犢山月占雨江雲課晴超超出羣落
落自喜爰以白華待養黃冠遂辭當官中州奉檄東洛然
而鄉樹生戀夢一夕而百回湖蕪致思意一篇而三致昔
者公理心遐頻辭丞尉之職少文神曠不怠邱山之遊援
古例今同符合節當夫青春涉夏面山臨溪開茅櫺望平
蕪瓜疇綺分麥隴繡合一雨乍注百泉競飛餉黍之婦攜
竹笠而山行荷鍤之夫解褐衣而波立溝洫均水遂忘機

于桔槔畦塍匯流本無心于畛域峰危瀑挂樹遠雲平陰
轉坐移風清話久是則製寬博之服可洗塵容習耕鑿之
餐漸忘肉食者焉他日者言謀魚租載積鶴奉歸耕西泠
之側築室定山之顛海潮乍來煙波自足又去僕釣遊之
鄉不及千里泛苕溪之舫或持觴而壽君眺漏湖之颿頻
策衛而訪我是又形神俱適寵辱相忘者矣錢叔美先生
既爲補圖而余贅以詩并敘其所志如右

燕臺話別圖敘

駒景朝發龍星夕流周子晴川乞假南下其友洪符孫送
之于國門外而贈以言曰足下結廬吳山寄籍燕國冀北
有產氣皆騰驤江東出材美過竹箭特以原思少貧江總
晚出廣蒞詞術恥馳名場蒿徑引月獨窺三楹之書蓬門
閉霜不邀十室之譽集蒲成編刻楮積學遂得 召對鳳

閣上書麟臺而天下心皆之儒目論之士共以爲山公寡
交或鮮博識陸遜最少曾無遠名不狂爲狂胡足深辨符
孫少生通門未竟家學陵厲一世離憂十年自傷枯魚益
戚窮鳥平原早逝已空陸雲之居樂安絕交不聞劉峻之
論南國縞帶曾饒贈遺西華練裘莫念疇昔桑柘半畝寒
暄一衣絺裘再更往返萬里陽元俠遊易絕劇子會稽僚
壻匿笑嚴生而足下握手人海訂交車塵一語偶出卽知
然明九言持贈特識罕虎延陵寶劍貽之于生前東里紵
衣有逾于舊好抑且論心十旬重任昉之嗣抵掌一室容
次公之狂僕舍足下又將誰與交乎竊念今者雲臺之英
不乏傑士金谷之彥非無俊才然升沈旣殊向背各異慨
此薄俗難平古風蒙有猜焉請陳梗概一貴一賤翟公勒
門賄交勢交朱叔創論膠漆故誼塵冠縣而不彈笠車舊

盟高軒峻而莫下簪笏置宴食何曾之萬錢縕袍不交陋
司馬之四壁千純最珍望朱戶而競納一刺至薄過衡門
而不投此一蔽也性情之友背于昔賢聲華之交擇及世
祿衛霍有室士皆琳瑜惠夷無家人必紕繆孝侯產札以
高閣而見尊子淵生男因陋巷而莫識此一蔽也一人登
朝九族分澤本以美俗豈云市恩乃百里官賦飽于閭人
之囊千金宦裝饋彼辯士之室駿足竊譽酬百朋而不辭
雁行密親分半菽而尙靳獲戾大府則心猶飴甘失儀清
流則背若芒刺此一蔽也又或豪騎四出錦施鞍轡華鏗
獨歸魚出鰲釜糧罕隔宿室有新聲之筵膏難逮辰家餘
卜夜之燭廉吏薄奉取供優伶薦紳華筵難以博弈質干
腋之服暢其盧呼陳雙南之金巧作孤注蘇季裘敝仍行
說秦阮生囊空甘作債帥此一蔽也足下鑒乎五交患此

四蔽取彫龍之才未遺凡驥與結駟抗禮恥失縣鶉儉必
呈度易晏嬰之裘奢能中權卻齊主之跡是可謂髮勁能
弩瀾狂可回者矣今以簪笈屢空羌無聲援盤匱莫供願
乞色養秣馬涿郡晨雞已號戒途歷山秋燕共返潁川之
羹歸奉護室江令之筆移吟鏡臺勤奉盟之職帟帷承歡
誦執簠之詩房敖屬和他日修史清祕補官石渠潘岳壽
母乘版輿而迎來東方細君綰雜佩而從宦家室之樂莫
愈于斯吾子行矣善節飲食慎緘語言毋柔脂韋毋炫軒
冕毋混目于朱紫毋蕩心于銀黃蔣詡三徑當春而布花
劉向七略計旬而卒業洛浦積雪頻過袁安之閭澹臺素
風不入言偃之室是足下之所能而僕所望于足下者也
公餞者凡七人高孝廉星紫旣爲補圖而符孫爲之敘云
跋蔣伯生所藏孫季述先生手札後

戊寅之秋下第出都訪伯生於齊河觀孫季述先生手札
四大冊鄭錦再襲裹山公之書齊紈數重護荀令之筆方
伯生之筮仕山左也適先生握兗沂濟道篆西都夜冥曲
逆至而投衡東閣晨開槐里來而倒屣吳江屬僚脫略繩
檢高密異客精研楊柯傳書朝來報札夕往半面百里頻
見華陰之牋一心十年廣致深源之牘非楚國蘭訊韓生
石交不及此也先生奪席班揚折角許鄭下鑒倚杵上探
結繩久在人心無容置喙當夫掇巍科入蓬苑名馳中朝
譽溢薄海疏勒謁者持紙而乞片言酋豪使臣執縑而問
奇字鏡日麗樹擬其聲華裾風動茵接此酬酢宜乎垣墉
不施畦畛悉化矣然而丙吉布席致定國而無從襴衡懷
刺謁宜城而不屑置身清流扶已廢之禮植足急浪回久
狂之瀾明明如月寄其奇懷巖巖者山共此風骨僚友憚

其睽孤薦紳以爲圭臬焉今夫齊竽秦筑以異聲而不和
澧蘭沅芷以同氣而相感伯生之於先生其情喻膠漆言
出肺腑豈無故哉蓋今世之爲縣令者皆貞石不介貪泉
久甘觚稜之義欽然緇衣之風不復手版所投乃俯入地
之首足徑奇捷長旨據案之心鳴鳩食甚勿恥二三燕雀
集衡偏工五六而伯生則表槩在握琳琅自持名士削牘
尤能匠心才人入官獨解強項又況北海地近常操經生
之觚東山政成績編循吏之傳與先生行誼不謀而合宜
其銅山鐘鳴聲應隔浦碧石苔潤氣交同岑百行之札戴
星而競傳九言之贈誓水而旌信也因符孫常撰先生杖
履稍測高深屬跋數語聊因縱酒遂放卮言今者寶墨猶
溼哲人長萎霜嚴冶城雪暗鐘阜蟬侵羽陵之簡艸宿謝
傅之墩積古之室朝陽麗而不輝研經之帷流塵棲而已

故鄭公鄉之俗死縱餘芳南孺子之男生猶未亂空使不
蠹之冊見珍於故人化鶴之魂頻招於詞客暇日睹其遺
牋猶不知涕之何從至也

與陳春颺書

春颺足下鄂渚急棹息息束裝適值足下張颺漢江奉檣
沔水不及握手有慚同心飄蓬弩飛別緒絲亂回憶論文
花晨煮酒星晚此樂何極斯人乃遙自別脂山附載米舫
湘岸百曲檣高欲傾江風一旬纜繫不解鼓浪之鯉橫干
蛟龍遵渚之鴻襍彼鷗鷺舟卑于窰窗小若棧素無臥讀
征衫坐披書蟬未僵穀蠹暗聚盈筍置卷多經蠹穿探囊
取糧漸被鼠耗又復朝雨初過秋陽仍驕晨寒已褰晝暖
欲葛及抵襄漢兩經浹辰朝發故城夕宿新市霜重砭骨
藉沾狂塵風寒裂衣兼灑凍雨下榻密親之署投轄故人

之居微分廉泉稍備接浙滯路逾月方克西行戒塗洛川

覆轍澶水衣履全溼襜帷半沈輶轅故關已圯蔓艸伊闕

高嶺俯臨長流商父之爵已沈民間

洛陽市上有銅爵左柱有父丁二字蓋商

物也惜賈昂無力購之

開母之銘幾沒階下

洛陽多古碣皆爲土人埋闕神勇廟階下矣

莫慰環軫空傷勞薪自洛而西景尤奇麗翠嶂屏列青溪

帶圍高鳥礙峯怒蜺截澗山勢高下沙痕淺深半嶺以上

皆支衡門萬山之間中間茅徑崖削千仞塗容一車土人

蹇衛入饌以當饗飡羸牛服車載彼糧糗甌甌旣平道積

石粒種稂已穫田生麥苗乃踰峭山遂達秦境峯峭頻轉

車危若縣百迴升天一折入地嶺樹曲曲援如猱登山程

盤盤行苦蟻旋函谷風黑潼關沙黃河流有聲日薄無色

非身歷其地不知動輪之勞涉險之瘁也伏念足下題綸

漢南擊蓋硯北雖官屈短簿而家餘陳編薦紳采其琳琅

同舟奉爲表檠讀史之席缸紅列金臧嬌之櫳窗紫蒙穀
消此豔福無慚清才近聞傷情逝波零涕舊雨

胡果泉中丞知君最

深昨已卽世

道履何似遠莫致之符孫窮遊十年遠閱千里幸

虛舟開府尙念縞帶能憐葛衫一枝儻棲八口可活近況
如此兼報足下人海之地邈焉置身尙望時緘語言善節
飲食秦關聽雞楚塞歸雁瞻望不及我勞如何

與蔣子瀟書

子瀟足下荆山百重蓼國千里覲面未及論心已深前者
曾馳魚牋遠埒雁足諒已正厥紕繆采其芻蕘足下以秣
陵之裔傳太尉之學劉向七略達晨而觀蔣詡三徑當春
而關歐冶擊劍無閒陵雲之心伯牙好琴不渝流水之志
日來追慕高雅縈繫魂夢未始不列誓松柏深同岑之思
懷人蕭艾積三秋之感符孫遇窮褰裳游倦負笈性旣疏

野識復粗陋鰲鶴守臧無會稽之能麋鹿駕車失馳驅之
範不材之木難乎施斤未馴之雞愧彼舞鏡簪笏高會忽
來沐猴之冠薦紳華筵襍以屠狗之氣每至僮僕匿笑賓
朋失歡流俗見之不知其爲何如人也同邨孝廉儻生茂
才孔融識人鮑叔知我旣入蘭簡無逾石交二子者才識
同茂性情殊塗伯則端表植槩不逾環中仲則飛流激湍
奔赴腕下他日謹嚴之作化其畛畦權奇之才歛以軌範
斯臻上乘無慚古人族孫竹卿人事削簡早工操觚人旣
倜儻詞亦妍麗但質未化氣未純耳夫圯橋以納履成名
闕黨以將命示禮西河設教傳應對之儀潁川著書紀溫
恭之則後昆詒謀先哲所尙況萬石之族昆季無愆三命
之家父兄猶在尙當於謹厚中求之未可學吾輩之不羈
也三益而外絕無他人十室之思維有足下楚水波綠隨

隄柳黃春寒漸消幸畜丰采

約蔣子瀟卜居南山書

子瀟足下竊以麋鹿爲禮不忘山居之心蓬蒿競生無逾
石隱之志是以公孫式廬羨東海之遠引參軍移文恥北
山之再出拔俗之念旣遠出塵之思益深側聞貴邑南山
秀甲南北攀藤可上無巔劣之危崖捫蘿以登有欹嶺之
奇嶂薜荔作壁華於翠帷松杉接天蓋此茅屋急雨乍過
而眾瀑競飛疾雷一鳴而羣壑皆應朝霞暮霞時有顯晦
而奇麗同致東嶺西嶺地接咫尺而陰晴異象驕陽麗天
則冬服絺綌凍雹在欄則夏御狐貉又聞此山前後三萬
頃縱橫八百里地無廢壤天無歉年引洗耳之泉則霖雨
自足承削肩之嶺則水潦不生荷鋤之陌無旱溢之患課
稅之田有十千之稅物不天札遂其生機人罕機智不墜

薄俗協守望之助無憂追胥收膏腴之產可給正賦洵物
外之奇境寰中之勝地暇日與同鄉懺生言及之未嘗不
動誅茅之思深結屋之想也嗟乎塵海茫茫積瘁者已閱
十載流暑短短易盡者無過一瞬其動也則風沙接軫心
憂其疲其靜也則箋牘盈案手倦於寫曷嘗有一拳之石
半圭之地絕塵而遂其初志哉他日買山獲資築室盈堵
尙望足下及二王當來同之縞紵舊交重以昆季絲蘿新
締申之昏姻鱗比之屋界之以綠楊燕來之堂署之以紅
豆蒲魚春肥膾鯉集讌稻蟹秋孰持螯校書陟岡側笠山
鳥自馴臨流鼓琴淵鱗出聽采葛可織覽羅綺之不華抱
甕而灌笑桔槔之過巧登眺之暇或夢羲軒俯仰之間竟
忘魏晉此未可與俗人道也是非同志誰能盡言入山有
心報我尺素

與孟蓀書

自別深閨皆值歧路燕國千里秦山百重戒道河洛日餐
黃沙載舟湖湘乃飲碧浪浩浩白水何關心期茫茫紅塵
莫問身世勞薪之悲抑何能已飛瀑之過逝者如斯茲來
依人洛東結室河曲素冊朝啟林雞助聲焦琴夜張巢雛
窺景藿液入饌以當饔飧蓬門緝茅不蔽風雨欲質白紵
忽驚霜華載瞻瑤臺乃隔雲海回憶挂瓢蘭陵解纜梓里
急棹催我支牀病卿糧難逮晨膏不繼夕輟此織素頻經
負薪歲序倏過言謀羹湯兒童乍長無缺衣履瘁積十指
愁長一心又復念客天末懷人河干魚書不來驚瑟久廢
漸瘦玉骨頻回錦腸自念披沙罕金獻璧猶璞鶴愧不舞
雁非能鳴回首鄉關何心車轂他日築室三畝移家五湖
積泥之山疊以文石入港之水疏爲小池田本課穡閒栽

紅疏唐宜種魚兼蒔青芝買錫春初甘似玉露說餅秋末
清分銀泥脫略緬檢縱橫簡策密雨灑徑言調綺琴清風
入帷可卻執扇蓬蒿閉門殊少車轍松竹繞戶時間機聲
薄覽百里無臻異鄉清遊數年卽擬同穴斯足遂雙棲之
思偕隱之樂登擔一肩歲越五稔莫厘別念恐消華顏幸
培桑麻閒理杼柚白雲在望有懷長河青鸞埒書無閒春
水

蔣節母誄

惟道光十一年夏四月癸卯蔣節母王太孺人以疾卒于
固陵里第月沈娥采星頽婺景蠡漏秋咽龍鄉曉寒嗚呼
哀哉大孺人生而淵令長而懿則曷滌曷否服詩人之絺
綌必謹必戒範禮宗之祿纓爰自仁里歸于德門粲粲思
柔補束生之詠蒸蒸色養佩卜氏之箴時橐砧近遊絲泉

遠貿而憊遷之入不敷盤殮就時之資無補鍾粟太孺人
 則顧杼宵起炊薪夙興織絹之手時而繭生縈機之心頻
 見穀轉糠粃珍蓄僅供并日滫瀡潔奉無閒問寢未幾而
 巢鵲占咎著蠶告凶識發陰堂之徵書遺緘篋之策太孺
 人哀銜于心痛齧厥指露紛晨襲顧景于一棺摩笄晝號
 欲從于九地而君舅在殯尊嫜處堂揭末封胡半遲儼皮
 之禮季畢昆我待吟結襦之章乃含荼暫生啜粥強起煙
 爨寂寂偕積雪競清寒砧蕭蕭與朔風相應子湘南生甫
 五年欄褫習書假窗塵之迹竈觚課易截葦管而書雖至
 秋陽炙櫺水沸于鼎狂飈振幄冰堅在衾晏如也更異者
 旣罹家中復值姑疾封臂夜半傷逾剝膚絮羹晨初和以
 熱血遽起貞疾遂延慈暉以至丹搜續骨沒齒而不瘳病
 已摧心臨終而無悔然此則魯國義姑偶言于齊子尉氏

季甫間告于阮咸而太孺人終未以語人也湘南長而屬
諸仲氏逾于嚴師勸阿買以承家鞭僧珍而見血太孺人
無怒容無戚色邑人柴觀嶽者湘南直友也子畜范達過
截髮之誼母事姜氏有奉輿之敬同岑之雅不分異苦他
山之攻資之爲錯迨至鮑照秉筆賦傳蕪城孔融能文名
播闕里蘭畦余佩備軼倫之才茆泮子衿膺拔萃之選方
期明目 殿陛振聲巖廊茂陵挾策將報所知穎谷賜羹
欲歸遺母而太孺人已不及待矣嗚呼哀哉申紙十回莫
罄百年之行負米千里僅備一夕之衛湘南哀至則哭喪
幾不勝符孫奉叔明之知無希逸之學傳馨鍾萬勉以銘
幽綴德旗旒敢辭誄長其詞曰

柔蕙挺資幽蘭結性淑質冰粹冲懷海映懿與節母實維
女宗鶴縷織慧龍綃綴工迨施華衿卽理寒杼梭絲曉迴

機錦宵舉秉禮閨閣承歡帟帷視膳肅肅問安怡怡鴛鴦
鍛羽龍蛇成識餐茶心惻茹藥口噤莫永厥歲思殉以身
失意人境縣神鬼門上有慈婢下無家督偏憐小姑迨及
諸叔遺孤勉撫先蔭暫承鳥謝集苑魚傷負冰霜濃壓欄
風銳破戶色旣凜冽響亦悽楚誰未離樹雞猶在埭鐙影
驟朗機聲已施嗟嗟慈帷忽覲奇疾肝脾屢摧肱肉斯割
神收格心貞抵斷臂迫欲矢孝遑及引禮擬雕藍玉言攜
綠衣誼過子惠情同母慈兼金在鎔大璞受琢編蒲業成
載酒學博兒少而壯厥聲英英張載俊譽陸遜遠名豈伊
兒才未報母德彼蒼者天曷其有極嗚呼哀哉艾黜而榮
荃香而折哀傳梓鄉陰墜護室幸播穆行永思芳猷體魄
縱有聲華則畱

弔汪容甫先生文

余幼學于庭誥兮誦先人之清芬溯曩時之良執兮首越
國之後昆思執經而問疑兮天胡奪我哲人悵親炙之無
由兮徒私淑于遺編嗟先生之宏達兮永綿維于羣雅實
囊括乎大典兮豈徒工于藻繪

寄案繪不韻

說不脛而走千里

兮徧寢饋于函夏闢寸心之餘地兮貯廿史與九經立片
言而居要兮貫七曜與列星偉謨述之滿家兮判清渭與
濁涇剖豪芒而析理兮別甘淄與苦澠伊經術之在人兮
綜辭學而并兼徵前賢之奧窔兮畱後起之鍼砭遠連鑣
于賈董兮近接軫于顧閻既悉臻乎大純兮復就芟乎小
嫌統歸本于天德王道兮探三古之異制原宗周之禮樂
兮通先秦之詁義幸微言之未絕兮藉經緯乎一世宜端
坐而論道兮乃不遇而棄置何降生之不偶兮名未書于
天府擊土鼓于西雍兮出大鏞于東序屈于將而補履兮

使鉛刀而揚武枝玉版與金匱兮遂畢命于四部慨天道
之難知兮曠今古而一網孔終老于風塵兮政橫行于天
壤跼恣睢于大地兮顏局促于陋巷道莫容而不行兮曲
寡和而孤唱愧鮪生之無似兮歷燕趙而長驅勉韋孟之
勵志兮感王粲之登樓鳴皋赫其盛怒兮恐失腐鼠于鸞
雛忍蛄蜺之爲伍兮寧鶴鵠之與居世爭趨于慕羶兮吾
願終守其故吾甘厄窮而如飭兮實惟先生之故彼不識
乎蓀荃兮亦何論于榛楮曾瑾瑜之見絕兮何璫玦之足
數敢興慨于莫吾知兮亦貞白而守素偕鯉庭而言志兮
申信誓以要之悲兩家之不造兮餘泣血之漣漣遺言歷
歷其在耳兮親色笑其何時庶服膺乎舊德兮或思古而
無尤命巫咸而大招兮召掌夢而告衷精誠接于冥漠兮
欲奉局于幽宮庶神明之來格兮儼然如見其聲容覽斯

圖而隕涕兮言有盡而心無窮

國朝常州駢體文錄卷第七

國朝常州駢體文錄卷第八目

溍則齋文十六首

陽湖洪麟孫子齡

漢魏六朝隋唐地理書目攷證敘錄

吳慎菴地理便覽敘

伯兄祐甫先生遺書總敘

擬新樂府三首敘

楊禮堂寒煤曉夢圖敘

周季華女史天啟宮詞敘

劉松泉太守青藜閣吟艸敘

方彥聞先生隸書楹帖跋

東皋艸堂記

楊忠武公哀誄

代董玉樞作

毛君拙齋哀誄

誥授奉直大夫候補戶部主事季穎呂君哀誄

誥授中憲大夫山東督糧道加三級例晉通奉大夫伯淵
孫公墓表

陸湘川先生墓表

先賢吳學士祠版文

祭養一先生文

國朝常州駢體文錄卷第八目

國朝常州駢體文錄卷第八

涪則齋文

陽湖洪麟孫子齡

漢魏六朝隋唐地理書目攷證敘錄

學者苟有志於沈博深湛之學魁偉宏特之略周覽古今之通變啟拓緯世之遐矩則地理之學急宜究心蓋非特稽前誥闡訓典窮鑿以駭奇廣搜以炫博已也核厥獲益實絕特焉觀其建置因創之規域形束壤制之軫轄都會國邑之同異遷徙倚寓之虛實星離豆剖瓜分鼎立則世變之巨源也察其陰陽向背之殊理候序緩速之殊氣剛柔華樸之殊民纁塏剽沙之殊土統紐殷曠俗產蕃異則敷治之通矩也凡脩古徵今坐言起行者於是乎在不其懿歟間嘗綜闡古皇式訓之旨彝道縣曖之要文命敷土

垂厥禹貢峻業鴻績永世作則凡山川疆域物產貢賦區
別蕃庶臚樹富焉上拱王圻下逮荒外總括率壤規式隆
焉煌煌聖謨聿啟典與百家騰躍權輿於此云姬錄宣制
六官崇職體經辨政炳哉首列總之以冢宰董之以司徒
專掌九壺曰職方氏元聖耆定緯綸區宇而於其閒輶軒
下賁綜采謠諺上貢天子厥編風詩於是列其民俗土風
章志無隱雖不專誌輿域亦後世風土記風俗傳所肇始
焉降及列國各有記載九州之志厥名九邱土地所生風
氣所宜彌不範蠟編帙燔落缺焉不傳迨我夫子取百二
十國寶書以成春秋方州圖緯悉承甄錄淵哉鑠乎先聖
哲王崇定彝訓式範萬祀而經有其六輔裨地者厥維四
焉可以見神聖啟覺之意國野經制之典而黃輿赤寰之
籍記上與徵聖宗經而同炳矣炎精肇興承百王未變改

遷徙統馭肇域嘗使劉向略言其域分丞相張禹使屬潁川朱贛條其風俗有志創輯未克宣究厥後班固作史始得攷述詩書推表山川前軌夏王下闡皇極炳麟咸耀肇冕羣籍矣厥後魏紀卓特之士覃思樹義覲遐揆邇甄序幽遠剔剔偉怪闡地絡之沈奧綜皋陸之蒸瀼莫不鈎互提闢萃離析合偉哉前脩鑒縣河嶽矣下暨六朝及彼隋唐名彥疊軌圖籍鱗萃綜厥體要爰有數焉坤軸山河存乎兩戒南紀北紀井絡是界保章掌之分星授職以辨曜躔以視凶吉蒼蒼上圖晷度是式太衍十二絡此封域秒忽以推浩渺乃測如靈憲星經太衍十二次分野圖諸書是也星野類一先民有言說地理者解釋經典惟茲攷詁紛悟莫免夏貢山川春秋會盟曰秀曰璠厥維功臣如裴秀禹貢九州制地圖論諸書是也詒經類二立百祀後上

測邃古岡宣沈墨莫可計簿墜勢九則經略在昔穿脅追
 冥極睇抵穴揆今則異覲古則難制隱鉤索肆力已殫如
 古今地名皇甫謐帝王經界攷都邑攷諸書是也述古類
 三繩繩九區恃帝治之變定疆理古皇鴻施代有神聖絡
 坤承乾稗瀛內外罔不化甄皇皇一統形東俱攝鴻英宣
 耀乃紀六合如應劭漢郡國志樂資九州志諸書是也一
 統類四翼翼天居連舉諸夏集萬國軫勝形獨跨秦既虎
 視漢亦龍興若臨堂皇俯視宇庭肇有十二是維帝囿歷
 魏齊周盤結福祐牛首天闕厥煌建康光宅萬方晉宋齊
 梁如周明帝國都城記諸書是也都邑類五古無分民而
 有分上或作蕃表或爲關輔奧密難撫紛駭難輯劇山殊
 號井竿萬集殫利察疾禁隱觀俗播茲遐規爲後賢燭煌
 煌計書上之太史天子秩之以統治軌如冀州圖經盧植

冀州風土記諸書是也州郡類六土氣融結時爲山嶽太
一中精涵爲江瀆苞殖萬彙駢賦汎濫爲天下綱爲諸生
炭石嶽盤紆形勝是恃河道變徙紛互莫紀以屏險陸以
轉漕渠區邑是畫食貨是都如名山略記四海圖等書是
也山川類七赫赫金城綰河鑰岑以當衝隄以作喉袷翼
以回郭環以湟津劫焉障焉以奠生民如周公城名錄等
書是也城郭類八奔星宛虹盤鬱嶮嶢不恃明德遂委蓬
蒿上推原廟下及幔亭叢雜怪誕萃茲仙靈蒼梧會稽神
明式馮旁及曠冢碣碑峻嶒如漢宮殿名吳均廟記繆襲
皇覽冢墓記等書是也宮殿寺廟冢墓類九維古師行日
三十里度疆越阡以齊方軌武夫從軍詞士游覽凡茲循
歷俱在創槩如陸賈南越行記等書是也道里類十邇茲
區壤各備撰述上表大事旁羅散佚史家續載限以時代

方志所臚域以一隅歷攷沿革詳厥終始騰褒裁貶與史表裏如三輔故事等書是也故事類十一嶽瀆清淑挺茲英秀奮起義烈扶翼世宙正氣磅礴邦家已光俎豆典冊名山是臧顯爍曩賢築範後傑炳其英輝頑懦以立如劉義慶徐州先賢傳等書是也傳記類十二黔首有性百里不同華樸勁柔各承土風通之則協恫之則紛拯性糾俗是在牧民如宋孝王關東風俗傳等書是也風土類十三殊陬單壤厥種謫異辨名詮類莫可勝計彙彼嘉產上貢九重職方陳之區夏雲從如異物志等書是也物產類十四開梧多顥壽靡儋耳魁頭露紉拱此四履一候一尉播以禮文哲士甄錄以廓見聞如支僧載外國等書是也外域類十五懿古圖書浩乎靡涯七略七錄遂萃百家惟茲地志條流紛躋日昉日澄始爲攬撫如陸澄百六十九家

地理書任昉二百五十二家地理書是也總集類十六凡
茲列籍臧于典府上可羽翼經注下亦繩架遐彥歲紀絲
邇兵燹煨燔規厥遺製略焉不存近代金谿王謨閱其散
亡力爲蒐會凡自漢魏以及唐代佚落者登其目散處者
輯其辭自古鴻生鉅英殊體異製莫不燦陳牒錄進覽輿
旨存亡撫絕厥功偉焉然淵博之間微寓闕失蓋微名地
輿必尙體要凡屬翰華何關坤載而目錄中兼載陶潛桃
花源記顏真卿麻姑仙壇記等書止取奢博遂失詳究則
濫入者宜刪也且自輯本諸書外止列名目不登卷數其
撰從何代采從何書委源茫昧本柢莫殫則失略者宜增
也辭孫不揆禱昧謬爲甄緝因仿宋王應麟漢書藝文志
攷證詳述源流輔以援引明厥體制使有據依綜而錄之
凡若干卷非敢抵牾先哲亦冀增以垂永也敘述之餘因

念古之作者雖篇篆寥寂而英譽振遠光若淵鑒韋帙之
足以傳人蓋若是也麟孫家世力學代承崇軌先府君少
孤勵志著述等身而於地理尤爲專家其刪範經典開闢
精奧則有左傳詁國語釋地等書其裨補史傳究證紛據
則有補三國疆域志東晉疆域志十六國疆域志宋元通
鑑地理通釋等書其敷宣景耀纂述皇輿則有乾隆府
廳州縣圖誌等書其綜攬遠遐編紀荒微則有伊犁紀聞
等書爲世作者典式來彥迄今宇內家有其書矣麟孫無
似不克仰體前列少有撰述徒事補苴益用慙慙因宣是
編之緣起乃植先世之崇範且明承學之有自云

吳慎斧地理便覽敘

嘗讀漢書藝文志形法類見其辨聲氣之隱真論物象之
終始以爲堪輿家言已懸緒於茲矣然元輿雖興牒錄未

兆及瀏覽載籍則庚泥述於敬仲已肇蒼姬坤鄉紀於華陽謂由符緯武庫之驗榜里預知鱗市之占延壽悉關水妃肇武於新室荆刻之說先興土禁陳疏於王男避忌之端聿起則知其緒夤隱實兆西京而緯候之中伎數之士遂引循其萌始云厥後條流騰踊圖錄鱗萃約其蔽痼亦有數焉夫宅兆有卜上聖宣之於彛經體魄所藏神明馮之爲元舍然贏博之痊觀者僅論其廣輪防斧之形曩哲聿詳其規度未有廣按沈與始肇元堂者也使必白馬經途燕領之祥始兆后蛇遺卵龍韜之略聿開則雲氣五色元旒所以應蒼符祥桑一叢黃祇所以表崇德悉皆元命之式馮豈緣幽窆而獲祐而必以恒幹之靈藏冀蒼靈之禔福何異祝甌窆於驪酌求罔象於驪淵此卜藏以求祐者惑一也至若仲任有言盛兆多理楊泉著論皋陸十形

石骨川脈地絡之辨堪徵弓弩斗升類象之方互舛然特
曠稽墳衍非必刻擬一隅也使謂山列八字本州之朱節
徵凶溪繞銅官桂林之丹枝擢穎則形類難棲詎必麗丹
書而湛族兆徵龍耳亦僅聆口敕於經途今乃執一坏之
荒壤徵十箭之詭稱峽岬低竦卽擬鍾阜之龍蟠顧綺遙
窺遂駭秦疆之鳥負此則騁彼遊談旣循迹而索履證之
曩說亦搜劍而鏤舟是按籍以求穴者惑二也況乎榮古
者近誣膠前者必惜馳術之子旣踳駁而出規炫世之書
更稠疊而絲理如必鑽礪往牒以冀悟領則羣喙颯駭蕞
雜鮮衷仰稽篇條或出七錄所載之外詳參年祀反在秦
坑未燔以前眇技所蓄必竊號於文成里豎所編遂假寵
於蜀相欲枿竊樛夔曠亦窮其元律思勵牖戶離朱且眩
其青曠此所以通儒曠其深瑕有識培其隱譎也乃必攀

條隱蔓援遐例今陳隧未啟必證名景純之篇荒埏乍臨
遂乞靈玉甬之牘圖曩賢之冢墓奉爲祖禰執晚近之空
石摹形古初前旣識十而遺五後復刊圓而就方此則闢
闢削刃亦仿姬宗之容刀鯁生樹礎必倣岐陽之樂石是
泥古者惑三也他若典本飾終固粟菽而無異事由跬步
近眉睫而不滑雖荷鍤便靈爲狂士之寓言而委土卽化
亦賢聖之達節使必賤同矯羣鑿智窵臆則泥穉川生地
之篇一車必磨判其夷險踴潛夫商宅之論半扇亦蠶辨
其東西是則崇班未列叔子之墓道已殘壯氣尙虛杜固
之隧阡先裂矣今乃近斥安途越險而謀穹隧詭移幽寢
播遷以震冥神遂至歸骸道闊預罄私臧之錢刀誓墓途
遐竟歿末孫之雞酒此則元紀壓泉已基妖禁之陋公輸
機封未免嘗巧之譏是好奇者惑四也總究羣倫盡同茲

獎擴清脩詭每難其人此慎菴先生地理便覽一書所由
作乎先生鄉邦文獻儒林丈人覃思契神博識邁往於好
學修古之暇尤加意於古墓之術加以沈鬱達源刪範通
於三古經緯包遠閱歷半乎九畹故於地脈之起伏水泉
之向背莫不鑒矚洞明通變萬有乃作是書以通蒼元旨
貫一拯亂固已集斯緒之大成視前哲而獨秀矣先生不
鄙謫昧授簡鯁生雖誦之下服膺弗替遂附曠牘一叟贅
言他日者南陽術學比戶共置其韋編記室葬經僮律皆
通其緒義非特藝術之偉業實禮終之鉅式也

伯兄祐甫先生遺書總敘

先生諱節孫字孟慈一字祐甫先府君長子也中式嘉慶
戊午科舉人已巳會試挑取臚錄國史館議敘湖北東湖
縣知縣卒年四十有四生平遂於史學著述至十餘種敘

曰

粵稽前載命族制業雖曲藝小通必永世作則凡百黎獻
是紹是維世濟其軌不隕其烈所以掌庠設官九重卽以
詔氏弓冶世守兆匠奉爲專門故能暢昭廬牟銘範通矩
有數宛貫肩之利無絲微吮齟之病上可以專精覃思下
可以繩嗣架績皇皇焉保世之樸本聖哲之遙識也炎精
兆興經師盛焉彬彬麟麟度越千祀如夏侯勝韋賢劉向
賈逵諸儒莫不父子相繼遞爲傳述是以伊雒編牒庭誥
卽爲師承儒林入官後轍以附先軌尙矣先府君少孤勵
學著述等身志行則垂光九區錄牘則編韋家術於是
我伯兄祐甫先生乃起而承之先生髫齒穎達銳意道藝子
炎酬賓之年智驚宿老馬卿對日之歲譽稱奇童竹馬方
駕已屢穿夫繩牀蠟鳳初嬉卽痛燎於麻炬蓋豫章句萌

早植其穴岳之幹疏勒潛伏豫臧爲騰天之波羈巾宿成
良有以也泊於壯年刻苦益甚意欲契性靈於曩賢顯光
神於宇宙博聞周覽縱獵於睢盱之朝沈鬱淡雅馳騁於
經史之圃陽燧未啟尙潛屋而沈思荒雞亂號猶焮掌而
遽慮孤詣所至人不測也用能鉤識索綸綵隱雕蔚發皇
乎經緯刊摘夫奧冥約純粹而湊矩融躋杳以入規充照
箱軫開闢戶牖億彥聚讖之獄穿脅以剖其謬羣難絕思
之端極睇以抵其穴如鑪冶百物燕礫與鏐鑄俱融犀然
增波幽冥與靈怪悉朗涇渭異源而合流故能驅萬塗於
同歸駟壯勞力而彙轡故能馭一轂以統輻先博觀以圓
照後精閱以攝契譬之夔曠審律必操于曲而後曉聲歐
胡察鑒必觀于劍而後識器故能區別九流駁釋五難實
剛格之大歸非摛揆之偏匠凡於天文地理職官姓氏以

及詩古文詞陰陽五行家言莫不曲暢旁啟鑽厲精博蒞
其修古好學之思發爲閎博英特之觀旣能沈洋適己亦
足超度流輩嗚呼先生之志誠瘁矣先生之學誠博矣使
隆以盛遇假之遐齡躍騰椒塗振厲霄漢田生標菑川之
譽梁邱擅琅邪之學應劭作漢官之禮儀杜撫定建武之
記注宣敷景曜綜采解禱勒勳金石揚聲虹蜺染彤管騰
洪輝則孝綽拔藻傳寫逮乎殊方包愷授徒牒錄盈於萬
計庶槩圖碣傑立晚雋奉平蕭該洞記或傳後世知有韋
曜而乃一官江漢遽遭不祿遺簡未傳乎禮堂幽室已掩
夫恆榦傷已沉乎英華稀絕勝帙寂寥叢簡三尺半皆蟬
巢瑯嬛萬籤竟若電謝使過此以往而艸玄奇字竟覆鄰
童之甌中郎竹冊不入班史之錄翰墨黜績尙何言哉麟
孫不肖承家崇軌而學殖庸膺不能稍有纂述勿替遐業

惟恐遺編日湮無所崇式謹爲編次箸其存佚庶使家規
永肅渠獲來者云爾

擬新樂府三首敘

齡孫自遭大故方涉百辰更值饑驅遠客千里悲夫麻衣
如雪生念俱消跂路回輪跬步何適李德饒之故里已慘
單縗王仲宣之登樓復傷羈羽哀鳥戒霜誰恤頽巢之痛
浮梗離岍已爲逐波之萍望孤雲於吳會親舍何存聆宵
雨於梁園諸舅睽隔心之憂矣能無感乎時也愁霖塞途
狂葉滿徑風襲虛牖沙飛素衾殘關一墮對春花而亦悲
倚桐半焦經時雨而不潤燕禽入越豈有意於菰梁宛鴛
嘶雲已忘情於芻秣哀樂迫於中年死喪萃於骨肉風土
違其故性壺飡厄平窮途庭柯無聲鄰笛宵警搔首夕起
不知泣然嗟乎脩士之生下別於毛羽半世之樂皆成於

事親乃旣不能樹蘭北堂種粟南畝餐仲由之藜藿烹茅
容之雞黍脫衣升樹曰爲長者折枝拾樵盈懷亦佐先生
之饌賣相如之文以易甘脆率龐公之婦共肩荷輿密親
乍過每齧周槃之臂宗姑列坐言傾慈明之尊逃薏入室
受小箠而破顏應門擘樞競梨栗而都走狂花滿頭學嬰
女而起舞鼻涕一尺入親懷而不嫌朝旭乍曜曝先人之
賜書宵魂正酣枕慈母之左膝如此歲月得假數臘雖不
能竭牛馬之力期無負於幽明亦庶幾樂童穉之年以自
適於魂夢何期覺極三辰禍窮六極岐喙冬蟄難容宏覆
之區樗蓄春枯竟少可馮之土餘魂墮裂喘息僅存又不
能恪守先塋長侍靈寢白楊手植補缺隧之松楸丙舍編
茅近先人之體魄電霆繞樹圍宰木而呼親風雪穿塋著
故纒而索土掇麥飯之一盂逢朔望以上食圖剡溪之尺

絹覲遺顏於晨昏靈牀夜哭林鳥助其哀號遺篋晨開閭
旭爲之黯慘乃火燧未改崎嶇遠遊寒螻抱樹乍經失母
之悲萋楚告哀復賦無家之痛吁其悲矣況乎庾蘭成之
身世陸士衡之弟昆南阮北阮盡廢糟糠山郵水郵無非
客舍十年賣賦葛帔依然八口長饑荒田未殖晨聽巢燕
心繞荆花夕望慈烏魂馳故隴惟桑與梓天各一涯父兮
母兮畜我不卒暉暉日月叫閭闔而不聞茫茫九京呼所
生而安在死生契闊之悲羈旅淪薄之感百憂植膺俛仰
若失幾不知生之爲重也於是揚激楚之響矢窮鳥之音
作樂府三章一寄三兄鄢陵一寄四兄里中且引以自況
焉矢啁噍之辭託燕雀以鳴怨抒天倫之愛馮豪素以寫
懷云爾

楊禮堂寒煤曉夢圖敘

吾友楊君禮堂抱悼亡之戚倩汪君叔明作寒煤曉夢圖并系以記索敘於余余觀其爲圖也裂絹一尺圍花百株冷雲不流翠巘孤竦曉月欲落立駭羽於虬枝晴櫺若飛插危樓於蛟背虹梁未駕卽是清虛之宮脩魂乍歸疑聞環佩之響粉墨曖曖絳晨旭而不輝星辰離離映殘燭而愈慘時也東方明矣玉繩已西若有人兮闌干之北黛展幽綠衫凝古青淚瑩曉華夢抱淒景五銖衣薄執素手而不溫千蜨帳深歟芳蘭而若隔嗚呼少翁役魂於椒寢是耶非耶劉幽覲婦於寒宵若遠若近荒雞唱後萬族其其魂銷化鶴歸來雙淚猶然承睫幻哉斯境瑋矣其仙可謂愴惻動人者矣至其纏綿之意懽恍之情則更可言焉蓋自塵縛初離臙輪遽轉聚窟之香無驗列眞之遊有因窗前青鳥詎訝身輕天上玉棺竟同尸解麻姑控馭雲璈靈

石之音木澗棲神桐柏金庭之所唾金盤而成獺蓀瑤艸
而呼龍青要鍊魄顏若桃花魯女飛丹餐唯芝葉固已遺
世若塵御風獨立矣然而浩劫能超餘情難熾青天碧海
未甘竊藥之心洛浦明珠尙有通神之枕由是幻彼花枝
伸其絮果返珊珊之鶴步到此何遲聽喔喔之禽曉時乎
何促衣香一握依然瘦骨之香桃慧業三生爲指疏籬之
明月此則春蠶體蛻尙畱一綫之絲精衛形離猶憶重淵
之恨未化望夫之石素志彌堅已升忉利之天舊恩常在
情至此乎傷哉命也而且言言解脫字字華嚴手散天香
諦參佛果歎唾俱成夫紺雨衫裳盡化夫仙雲豈非飛瑤
小謫本具靈根故紫玉煙霾猶徵精爽此圖之所以傳其
梗概也嗟乎迴迴碧城無可通之路蘧蘧丹蜨無可馮之
方古裳危髻何日能來蕙圃芝田幾生脩到況歷塵寰之

憂患已怨鳩媒豈列金闕之真如猶耽黛語而欲招遼天之鶴景續夢裏之膠弦則莊嚴七寶春風之面空存縹緲三山靈碧之峯何處不且哀逾於分志近於誣乎不知倩女多情才人善幻聽紫蘭仙媛之語漢武神飛傳鴻都道士之言上皇涕隕庾蘭成之傷往欲賦大招潘安仁之望廬申之寤寐則未離楚岫自有神光再入華胥能占合魄蓬萊萬仞有查客之來尋香艸一叢或虞兮之所化故不妨假此丹青尉其繚悞所謂迹逾荒渺而情逾懷其者矣況乎宅近孤山堂開綠野植脩幹之百本塞古香之一庭他日聿展斯圖再澆濁酒明蟾一鉤鑑薄眉而欲語脩景三尺隔夕陽而可呼有美一人宛其入室庶玉扃私誓侍婢可以竊聞絳樹蘭儀仙禽藉之往返則讀僕斯文又當掩卷而太息者也

馬
周季華女史天啟宮詞敘

前明陳仲次杜有天啟宮詞百首談天寶之軼事抒茂陵之古懷翟泉鵝起池畱劫灰荆棘駝封淚灑銅狄義符風詩名著天錄尙矣今季華女史踵而和之漢家舊聞曾藉班昭而續錄王建而後遂聞花藥之新歌華嵩竝高觀者目駭而余則謂女史所作有較之原唱而難焉者今夫方間之士縱學之儒抱才識之三長總廢興於千載權輿睢盱抑揚南董寓衰誅於豪端包著蔡於腕底見間旣擴組織何難然而神智未周論或囿於一目睂睫隅隘天難窺夫九重況乃授管繡餘倚聲粧隙命儔止於井臼之地足跡限於門樞之間析奇宵半僅有諸姑蓄疑盈千難詢娒嫗而欲奏古搖豪傳往削簡問銅仙而不語吹鐵篴而泣然霓裳曲罷舊內春消玉樹篇成殘棋局換笙歌艸艸談

南渡之君臣禾黍離離慨東周之宮闕而且馮弔衰朝數
陳殷鑒縣鏡以燭理亂微顯畢宣提衡以別賢奸索黍不
溢不綦難哉不綦難哉而余更有感焉自古童昏之朝權
必操於婦寺立黃之厄禍先兆於宮闈故禁城縱獵釁起
克明紫殿焚椒先傷遼后王聖寵而京閭構逆趙嬈尊而
甫節煽災此則政由嬖相讒起女戎茄花委鬼穢本兆於
荆餘白馬清流禍遂成夫鉤黨宙合將亂衽席先危長楸
無失則臯外戚以陷之皇儲未育則并妃偶而絕之以至
饑承間漏墮龍種於腹中餌置柱衣斷鸞釵於永巷身居
黃屋而莫保妻孥治總蒼黎而難畱亂嗣凶殘已極孱弱
奚堪作者於此三致意焉誠以不能保國者未有能保家
者也而能正家者未有不先正身者也作者以許國之善
懷發匡衡之正論是知中壘列女之訓契之已深大家東

征之流斯文無愧故能垂爲炯戒播彼芳型則此一編非
特史氏之外乘實治家之格言也是爲敘

劉松泉太守青藜閣吟艸敘

王癸之間余薄遊中州客前衛輝守劉公松泉行署者二
載公一代偉才九能備學播政上希乎韓范膏雨下達乎
蒼黎在官之餘雅好文翰時也聞孫弘之東館值司馬之
南遊何遜摘才信陵好客每當霞月上采淥觴卷波金槃
之殘蠟未銷銅盞之吟聲四起相與飛蓋遶詞致足樂也
無何官閣謝病賓筵墜歡北馬旋辭西陵長往鄴中尊酒
之會零落傷焉蘭成思舊之銘平生已矣今春公子勳奉
轉南還以青藜閣吟艸四卷見示并屬弁言嗚呼翰墨未
燥車馬已空遺橐一函歸骸千里室無半隴之植庭有頽
白之親慨孫叔之廉吏并少寢耶見任昉之遺孤依然葛

帳是可傷矣至其詩也則囊括羣才輝麗萬有孳甲新意
獨抒性靈矜月授豔池明翡翠之豪亭風汎馨手滌薔薇
之露餐霞一樹而肺壑皆香抱骨九仙而瓊瑤作想不以
才氣轢眾不以奇古自矜固足上抗鮑江下希溫李兼劍
南之華實擅小杜之風懷蓋鯨夔肆響不如秋軫之感心
熊豹呈肴不若石華之說口也若其生平遭遇悉寓於詩
則夫人事之合離身世之榮悴尤有可言者焉蓋公少承
鼎族隨宦京畿生長燕雲已挾越石清剛之氣門材蕭炳
卽有越公橫厲之風射虎金臺千人辟易橫蛟極浦一舸
遄歸遂乃就舊里之鶯花問西疇之松菊南朔千里川途
百重過叢臺而置酒月慘龍簫經碣滹而亭騁雲霾虎氣
家住佛狸祠下社鼓填門人來邊馬叢中風沙滿袖故能
車馬鬱其器識岳瀆助其衿靈匪祗才雄實由天授此南

遊艸歸吟艸之所由作也逮夫重隨宦轍游歷瀋陽風躍
黃驄城高玄菟三關險峙匝地邊聲大海前橫極天雪色
客問東都之賦韻叶宮商人攜南國之花牋調蘭黍凡夫
金遼虎戰之方我漢龍興之地韓彭之所耀績罷貉之所
兵爭莫不聚河朔於掌中發藻績於馬上莽莽沙磧幼安
成遼海之遊茫茫古懷沈炯奏通天之表況乎一慘麻衣
再傷錦瑟聽鶻唳而兩泣聞蟬嘯而悲來其境愈難其才
愈鍊此燕遊遼東諸艸所由作也泊乎廷策賢良名齊獻
璫送士龍而宰邑奉版輿以西遊地入王官山臨全晉關
雄倒馬漢月猶臨塞接飛狐秦雲怒躍三垂岡古灑酒而
弔沙陀六角營荒撫髀而登殘壘明駝一隊塞雁千行寒
煙枯艸重邊高斛律之吟鐵馬金戈獨夜發琵琶之語此
晉陽艸所由作也厥後筮仕中州歷臻守令萬峰圍邑一

榻迎人攜琴鶴以垂簾集儒臬而題詠龍門秋曉山色當
窗麝墨宵飛河聲壓紙攀少室煙蘿之境古雪探香聆緱
峰笙鶴之音孤裏若月其閒又復兩觀丹青親聞天語一
官河洛臣心長夢夫螭勛十載長安朋輩久迷夫鴻爪於
是紀恩有作懷舊名篇彬彬乎杜陵愛國之忱向秀山陽
之作此中州艸北觀艸重遊艸所由作也嗟乎以先生之
學行淳備茂政旁敷俾得敷歷節鎮潤色鴻猷豈特此而
已哉乃官未卽眞醫難療疾丹鼎少長生之藥焦桐有半
死之心淒淒秋簟已類枯枿慘慘寒雲復凋荆樹期功之
喪壘至膏肓之疹遂增旅殯旣歌斷編空在平原一去酒
空灑夫墓門丁令歸來魂已化夫孤鶴余所以甄敘斯編
不禁涕泗之橫集也道光十六年春季陽湖洪黼孫敘
方彥聞先生隸書楹帖跋

右隸書楹帖十四字大興方彥聞先生遺墨也先生歿後
 五年長君元徵持示齟孫并索跋語先生著述等身文辭
 冠代翰墨特其餘事耳然猶足上肩漢魏下掩諸家固當
 世所共識者也而齟孫所以執簡悲來者則又有故焉蓋
 戊子春間辱君知遇得附交末先生是時已位隆赤緊名
 滿士林李膺入座望者比之爲神仙退之成文讀者仰之
 如泰岱而齟孫則戢景窮櫪儕身庸保比屋之士不聞其
 姓名一畝之宮久蔽夫蓬蒿又無平昔之雅半刺之投可
 謂縱跡遼闊者矣乃蒙虛衽下交廣爲延譽幅巾而訪窮
 巷削牘而賞小文過冀北之野轉盼千金得汝南之評回
 春一語緬茲古契有加曩賢方冀後車同載學海常探其
 保始終並騁才力豈圖一官遠方尺波電謝送西陵而長
 往招長鴻而不來范巨卿之車馬空赴江干王子猷之竹

林僅餘故宅天高莫問理不祐夫善人魂迴難招酒空燒
夫坏土哀矣忽矣嗟乎士感知已物貴同情捐荼茹蒿者
必無羨於豹胎棄瑤拾礫者必不珍夫荆璞般旋盛儀或
見嗤於裸俗繩墨巧匠每遭忌於曲株故離光非燧人不
熾楚金非歐冶不剡沈閭在握須明砥以斂鋒珎華出巖
仰監諸以暴采乃浮磬欲振而桐魚已枯寒鍾欲鳴而玄
霜俄散譙護設而夢曠亡黼黻陳而離朱逝子敬有亡琴
之慨伯牙抱絕軫之悲人非卿木其堪此乎今者苓落遺
縑英華稀絕鎗昏暗辟紙慘生皴追惟曩昔命儔笑侶拔
藻傳觴墨濡首而淋漓刃摩天而詆蕩讀大謝之什水木
生暉展小李之詞觚棱煥采此一時也何其盛歟孰期款
款生平尙憶雪泥之鴻爪而茫茫異路空畱破積之蟬篇
鶴歸國以何年豹畱皮而僅在西州之慟太傅無聞幽明

北海之見虎賁宛然心目典型之作其在斯乎所幸者蘇
環有子鮑照能文守此零編繇其手澤然而蓬蒿三徑尙
假他人琳琅百面未付削氏拜北堂之尊老鳴咽商顏遇
東郭之遺孤淒涼秦贅又當覩此而泫然者也敬贍楮墨
聊誌微忱幾字空存九原可作庶使拜徐君之墓孤劍同
縣荅劉沼之書神明若接百乙未六月洪麟孫啟

東皋艸堂記

余與楊子小懷羈絆締交松柏相說連蘊疊軌爲歡彌年
且里閭相望遠不數武每文史餘晷輒挈榼市醪飲其家
東皋艸堂解衣踞石灑翰盈壁探巢層林之顛躍足行潦
之水婆娑灌莽之中俛仰蓬薜之境悼今撫昔激情厲響
沈酣淋漓雲湧飄颻視者愕眙哂其狂逸而吾兩人獨登
賞久之至不忍去其瀏覽所未盡者乃退而爲之記焉東

臯州堂者楊子先世殿撰靜山先生別業也先生一代偉人鄉邦文獻宏嗣騰踔於錄前美其振聲巖廊回翔蓬閣者後先相望下至羣從子弟莫不耀珠抱璞飛藻騰躍至太史芝田先生時上溯艸堂之成已閱數十年矣時值海宇甄平物力殷庶凡拙簪之散老薦紳之遐彥莫不揚扆隆美抒寫性靈每當觴酒高會賓從填溢朱茵且陳流水接軫官燭宵宴凝輝絳霄列筵東西華軒不足容其軌題藻上下高垣不能畢其詞是時艸堂勝槩振燭遐邇一時碩德鴻寗又狀其靈奇永以絹素蘭亭之會披卷若親其笑言桃源之圖閱者俱羨爲霄漢於是東臯主人復薈萃景物博徵雅歌則漢南諸作衍化於周京鄴中七詠高視於千載嗚呼盛矣而代謝時殊今昔同慨魯國之靈光不峙南皮之勝遊已空將軍之殘客任安僅存丞相之舊僚

羊曇空淚風雲若馳秋艸已遍霸陵之田攘之以作圃小
園之賦閱之者傷心迨至德祖之生已傷茂艸之嘆此楊
子所以緬世德之清烈撫斯園之盛衰不能無慨者乎然
吾獨爲艸堂幸焉今與楊子攷桑梓之闕軼綜耆舊之遐
聞其炫麗瑰譎至張氏青山莊止矣當其摹異役華崇侈
鬪巧未嘗不嘆古人之未工冀後嗣之永保乃當其始不
過角執袴聲伎之用及其敗不足償培克取盈之辜日未
及瞬薰滅蜚歇爲子孫者欲於頽垣叢莽之內分片楹半
壁之安已不可得矣然此猶不越豪僮婪吏之計也若隋
大業中作離宮於毘陵縣互者數十里分列者三十所此
其人躬元旒之尊極區宇之力殫東南之美拓耳目之侈
然役夫方怨於宇下矛戟已起於四海帷帳之具未及移
銅駝叢棘矣榻禁之號未畢書金僊隕涕矣非但不能示

累葉以崇制遺雲初以遐美卽求一轉轂一矚覽已若駒
隙而不及此峴山涕淚太傅寄其遐思造物逆旅蒙莊不
獨寓言也而斯堂獨閱二百餘年之久巋然獨存當其盛
也爲鉅卿瑰瑋所臨賞吉金樂石所會奏有編韋以表其
迹有絹素以永其傳縣景銜曜非不極先德之盛舉也今
卽蕪沒於叢林敗圃之中而未孫遐胄猶得崇其世守分
其幽景晝則誦弦於其閒暇則登眺於其際盤桓林薄馮
感陳迹恍然見我先人締構之艱諸名宿泳遊之樂於是
證之故聞諮之宗老播昇平之隆軌宣之以麗辭闡世矩
之清芬遺之於後雋則雖風移轍殊而與感疇昔景響若
接其盛衰之際爲何如乎抑余猶有進焉者楊子仰承偉
矩夙懷軼才而羣從昆弟又皆好學修古英絕領袖則他
日敷宣景曜陶淑繼聲方得紹休諸先生之令緒而不廣

其高矩是覩榘桷之傑構聿興有恤之遐美則世濟之宏烈續承之英談於是乎在豈特爲遊騁之樂而已哉余故樂而爲之記

楊忠武公哀誄

代董玉板作

維道光十七年二月己酉朔越二十八日丙子 予告陝甘總督宮保楊公時齋薨於崇陽里第年七十有八赴聞詔贈太子太傅兵部尙書入祀賢良祠賜祭葬諡忠武禮也嗚呼雲臺上將應列緯以光九區太白一星聚天軍而張六伐自古仁武之朝必尙耆定之佐故鷹獵或傳其義概虓虎或奮其折衝然未有具拔山超海之才兼緯武經文之烈勛績則熙天耀日哀榮則震古鑠今作九寨之長城爲太平之福將者也若乃八柱表承乾之績力補坤維五百應名世之期才堪帝佐漢得諸葛爲魚水之君臣

天生李晟奠鼇峰於社稷則於忠武公見之焉公諱遇春
字時齋四川崇慶人也稟靈辰極奎圖炳昴宿之祥氣感
雷精蜀道誕元臣之秀夙懷倜儻代嬪雄奇南陽以管樂
自期東方則孫吳早讀蟻臂善射虎頭能飛山川縣於目
中蛇鳥握乎掌上班定遠縱橫萬里投筆喟然祖豫州擴
清中原撫髀當爾始拔翹關之科遂以勇爵入仕大鵬鼓
翼馭風伯而奮南溟天驥呈材挾霜蹏而起西極我 國
家遠關雞林大恢鼇紀羌渾九姓盡拱金牀蕃落六州同
歸赤縣析木蟠桃之外亦置星郵奇肱儋耳之邦羣瞻日
鏡然而弄潢阻化負矢嬰城瑤階舞威不無梗化之梟心
玉弩垂芒尙有當輪之螳臂公應運而生以削平爲志光
顏自誓不與逆賊同生千秋立功每作軍鋒之冠自歷偏
裨迨登侯伯歷右轄者六省典方州者十年宣力 三朝

振威四宙虔劉我螯賊蕩平我邊郵翌贊我

廟謨棟梁我宸極李隴西之述軍績前後四十餘年尉

遲恭之表舊勞大小七百餘戰杜太行而泥函谷意氣無

前礪泰山而帶黃河身名俱泰綜其所遇有可述焉蓋聞

量不宏者不足以成大業威不遠者不足以言武功是以

景略王佐之才不過經營雍益王濬龍驤之號止得締造

荆揚樊鄴未歷夫窮邊甘陳未平夫內寇雖竭囊底之智

難馳域外之觀公則兼容并包長駕遠馭餘皇之舟千里

犀兕之甲七重樓船下瀨則閩海之戰開其先束縑焚山

則黔苗之平當其次左犄右角則川楚之勦極其難消凍

澆瑩則衛滑之捷驚其速迨至西師克平南宮圖就千八

百國盡張騫鑿空之區一十三州俱周勃連營之地古未

有南踰張海北度陰山西定雍岐中維江漢以一手一足

之烈成九天九地之勛恢恢乎聯絡宇宙彈壓江河此則
羽翼七十士對此懷慚武成第一功於今爲烈此公之功
也且夫勝負者時也屈伸者運也雖王者之師可以有征
而無戰而梟將之略不能決勝而無遺是以昌國君力定
全齊獨莒不下廉將軍威加海內用楚無功壯士受困於
平城名將失途於東道公則力敵萬夫目無全虜凡封狼
生驅之穴盡埽機槍呼孫黎母之鄉窮搜甌脫一戰而清
海澨再舉而縛單于莫不迎刃關開應弦敵倒陳無堅而
不破霧有毒而皆消其攻堅也若奔牛之觸魯縞其摧敵
也若騶馬之戰鴻毛傾海水而灌螢鼓天風而捲蓬七縱
七禽而自若百戰百勝而勿撓此公之勇也矧夫出奇無
窮者兵機知死必勇者烈士惟智可以禦敵惟忠可以忘
身使必擊刁斗以自衛程尉所以失士心不易徽章以應

機曹翰何以通奇變公氣激玄雲忠貫白日每當柳營月
黑巨礮宵紅地逼飛狐峰危束馬四面盡淮西之鼓三更
裏劍閣之縣輓垂組以瞰危城據斷橋而截敵騎萬弩齊
發一軍皆驚周亞夫兵自天來中山王戰如風發手搏萬
眾膽周一身向沙場而談笑何畏虎牙撫志士之頭願本
宜馬革故雖禽元濟於雪夜謀出萬全而納光弼之犇刀
志能一決此公之忠也或者謂抱雄略者每拙於撫綏昭
果毅者或難於惠愛是以江淮艸木僅知萬福之威名壁
壘精嚴共懾臨淮之將律未必恩威竝厲文武交資惟公
斧鉞西河黍苗南國移桓康之英銳作山甫之柔嘉敏之
以利煦之以和蓋寬饒弔死問生視同家事蘭陵王一瓜
數果徧逮衙兵所以射生五百軍人戴公如父虎落千七
萬里倚漢同天望見兜鍪向子儀而下拜遺畱弓劍祀公

綽而如生此公之仁也嗟乎毅烈之性生也如此謀略之兼備也如此然使頗收偉才未得始終於勛業張廖無命僅能揚厲於巴渝則飛將而不逢隆準空歎數奇國士而遇以眾人曷稱知己何能奮龍轡之遇合依霄漢之末光也哉惟 聖朝之待公也恩靈稠疊超絕等倫兵事則全付彥芳碩畫則唯資裴度衰光寔爲蜀中俊杰倚唐邕爲天府金城摹狄公之貌狀千里披圖助大經以期頤一廬賜藥近瞻齒髮平生故舊之歡袒見癰疽置腹推心之說詢文淵之方略百戰功高頌

先帝之冠裳九重天泣古未聞方叔召虎得邀分陝之榮介子會宗內列喉舌之任乃始列爪牙終登柱石由武階而任方岳自裨將而位疑丞故公之功韓岳似之公之遇李郭愧之此古人所謂非臣之力君之功也偉矣哉天地

之釀化至矣日月之恩曜宏矣所謂乘其運也大壑縱其
鵬鷖得其時也名山出其雲雨此公之遇也至若陰謀爲
道家所忌全盛亦造物所慳公則躋上壽列鼎鍾再世建
牙旣將門之有將一經傳德又官族而爲官廩養俱擁夫
節旄子姓亦分其縉券蓋能扶天下之危者必能臻天下
之安能除天下之惡者必能享天下之樂故李英武之功
名偏饒福澤劉仁勲之富貴上協天心此公之福也激湍
易摧東岱長往大星驟落光駭晨雞玉帳空懸悲嘶擗馬
勢面而旌旗盡溼七萃銜哀當宵而甲楯騰空百身莫贖
然而生作通侯死當廟食雲旄特起近聯蜀相之祠堂嫺
爽猶存共懷鄂公之毛髮易毀者恆榦不磨者令名此之
謂矣基誠式慙文吏未習鈐圖與趙欽爲同官慨想營平
之績觀辛茂之令範尙餘將帥之風敬述前勛用章旗綬

聞蘭相如之生氣曠代遐思作楊荊州之誄詞終篇增樹
誄曰

翼翼岷嶷上絡東井金精所聚代生異類熊飛大野螭升
九冥篤生虎臣宏我漢京煌煌聖謨奄有下矩醇化所
被日體月戶惟天有鉞孰敢不庭蠢茲小醜耳擊是萌桓
桓我公以身許國攘之剔之以奠皇極溯公起家材官厥
張拔茲哮鬪厥維文襄疾霆破山猛氣斯在提戈從戎兆
自閩海鹿耳東峽鯨波沸空隕眸一呼百川盡東沈淵截
蛟搜莽縛鯨二酋成禽克定嶼島涼秋八月出車皋蘭三
門五壘氣奪巖巖關閒道榛埋疑兵電駭鼓角齊鳴敵不及
賊剽城克邑翦彼封豨撫以惠德宜暢皇威羣苗逆命
如蔓如藪塵兵獨進疾若鯨吼探彼虎穴說降梟軍送者
失色灑涕轅門銀牌纍纍絳旛幅幅公有恩言降者受縛

沈沈太尉戴頭而來花苗有萬歡聲如雷由茲陷陳摧腐
拉朽黔山肅清民安於畝花范西川渺渺衡湘地大物博
毒虺潛藏呂母逞妖盧循鼓洙彌山滿谷鳴張兔脫幺屠
未滅何以家爲墨衰從軍泣血擁麾握奇制勝左馳右突
東西十年須髮盡白崖危百丈梯懸一綫拔蘿先登趾若
激箭艸履似鐵繩行欲飛縛人而投如弩發機龍麗十重
蟻賊四伏呼聲動天一可當百結營增顛擲芭萬點賊從
暗來足已蹈破夜朗如晝鏃飛有聲追奔逐北賊巢盡傾
旨哉公言破賊以智凡所指揮無不如志公有異稟虬須
偉身上馬入陳懷如天神賊聞公名不戰而懾倒戈膜拜
願就驅策公陳大義誨之諄諄泥首泣罪梟獍皆馴頌頌
黎陽境聯衛滑篝火狐鳴危城虎攫公率偏師直當其衝
斷彼脣輔勢若撥釁賊馮高墉投石如雨負嵎睨睨萬眾

氣沮公時孫進羅馬臨濠六矢箸面屹立不搖未及十旬
紅旗奏捷克復巖城如沸沃雪寬彼脅從誅止其魁狄老
攜幼嬉遊重圍曹彬克唐名振平鄴德及萬家是爲生佛
逐列五等受知 兩朝潛魚縱淵神虬逐麋甘泉賜餐延
英召對指畫機宜其語如繪事速則集惟蔡之師琅琅萬
言屢頌 聖頤

先皇曰俞汝實國彥矯矯淮陰獨當一面我 皇恩顧冠
絕臣鄰夜半前席執手涕零咨汝蓋臣

先帝所識干城心膂世篤其烈滑州之役惟汝有勞錫之
侯封析圭珥紹公不遇時田閒秉耒功旣冠世恩亦蓋代
綢繆恩紀等於家人歷萬萬古聞者感興立德立功揆文
奮武遂脫刀韃封軺行部我出我師於彼西疆 天子命
公參贊戎行遂超輪臺耀威沙磧據鞍顧盼神采奕奕長

穀雷野高鋒，雲擣虛批亢。埽清寇氛敵，據南峇列陳。橫
厲旗幟互，天不見其際。逮一晝夜，毋敢度河我公奮。然夜
不枕戈提盾宵行，直擣其銳踰溝三刻。士氣百倍，波騰馬
足。須進火光，大軍繼進。膽落羣羌，六角頭飛三門面縛。遂
封燕然，還鎮西岳。甘涼十載，民困全蘇。知足知止，翩然里
閭。手戟雖拋，宸眷猶渥。屢承天問，恩賚繹屬。帝方倚
眷，天不憖遺。大化俄至，光閃靈旗。日月有時，休神后土。易
名錫葬，榮超遐古。巴塵如雨，關月如霜。一哀三峽，蕭森白
楊。湛湛錦江，隆隆武擔。陵谷貿遷，盛名不刻。前有卧龍，後
有令公。與公而三鼎峙，寰中形煥。麒麟慶威，騰石馬式。此珉
詞光流裔夏。

毛君拙齋哀誄

維道光九年歲次己丑秋七月二十九日同里拙齋毛君

卒年三十有八嗚呼哀哉秋蓬炤林豫章之幹以燬宵蟻
潰穴崇城之垣遂頽山雞翳采面鴻濤而自沈素絲元姿
縑筠篴而竟絕蒼蒼者帝莫愬其沈冤昭昭者名遂鐫於
眾口團潰殲身積毀銷骨遇何奇哉哀矣怨矣君諱廷俊
字德元江蘇陽湖人所居爲毛家橋曾祖九榮祖崇雅俱
爲學官弟子萃族而處猶承古風一經之傳衍爲世架父
一鳴少懷異才屢困童試文瀛景鐫耀光士林齋志以及
鄉里悼嘆君幼秉家規志行絕俗敦行淵邈廉靜寡諧此
荃蓀孤芳雖叢幹於茅苴而鸞鳳高舉已遠謝於蜩蟬矣
刻志厲學崇闡羣藝苟會通以鑽要刊聲輒以闢華覲瀾
而索源敷理以舉統用能執萬塗之樞要爲一體之通製
此吳幹質勁以管羽而益遠越劍性利以淬鋒而愈銛焠
掌約繩無以喻其力學也而家世寒素困約日甚五畝之

宅旣入券而賃廡十雙之田以逋租而償人負隰薪以供親采巖栢以佐讀糧無越晨不橫潦而縣隔室徒壁立披牛衣以代裘決踵見肘無以喻其貧窶也年三十四始補博士弟子員旋丁外艱哀毀盡禮越二年服闋應試中式道光戊子本省舉人僉謂君世德之積累綴學之苦卓造物者必有以報之由是蜚英譽騰茂實奮躍椒塗陵厲霄漢其所爲顯其門閭光於當世者未有艾也嗟乎通塞者命也報施者理也修德必昌其或然歟明年公車入都會試報罷後卽行旋里嗣爲族人牽涉構訟情事紛擾半載未解於是君之力大瘁而君之名亦大損矣先是君鄉人素號善訟及君中式後又欲挾君以制勝而實非君志也蓋君秉姿木訥沈潛自好文弱如不勝其衣緘咄若不出諸口初非有雄資厚勢以脅里黨深文峻旨以險詞牘不

藉權要以結當時不爲詐刻以愚鄉曲特以爲人制撓受
世指名嗚呼流言屬垣慈母有投杼之走業屢置牖大賢
抱竊鉤之誣眾議成林無翼而飛三人言虎合市以懼何
者近淫者易腐逼塗者易汙暑緣柱以直風以隙而側眾
曲不容伸眾枉不容正此所以曾子立孝不過勝母之閭
墨翟非樂不入朝歌之邑曩賢先覺良不誣也當訟之與
君辭之甚力嘗匿戚好處亦卒不獲命君之苦衷可想見
矣蓋君自少奇寒嘗受人推解及公車之費亦半由眾力
旣爲附和遂無解免之路嗚呼施人者恒驕受施者恒慙
升斗之惠僅潤枯鱗邱山之名遂墮深谷分宵燭之末景
竟虧其素脩假雁鶩之餘糧而酬以恒榦雖眾心之不諒
乎亦貧之累人深也迨呈牘連控當事者亦以鄉人故井
不直君旣違素行又遭厚誣痛繳繳之易緇矢落落而誰

諒天高難問雖呵壁而莫騰海或能填欲埋憤而無地鬱
結未伸得疾以卒嗚呼哀哉名由眾立亦由眾毀排天之
幹因殫綆而竟靡尋丈之峯以積雷而成穴所以賤臣叩
心玄霜襲乎燕野烈士銜憤白馬奮於吳江固化碧於三
年終遺恨於九地矣雖然累我者貧墮我者名故丹以色
磨肌翠以羽自焚使君韜景窮櫺戢形漏室何至勞精於
牒訴牽役於里黨哉乃假之微名崇以扈抑此向所謂光
於門閭顯於當世者非以福君實以禍君耳穹穹上天曷
能測哉而論者獨咎君不能自拔汨於俗流嗚呼萬人轡
弧以中一鵠雖百步亦傷千鈞繫綆以縣一柯雖勁幹必
折況激之以宏誼臨之以宗黨以窮鄉愿訥之士當眾志
成城之下者乎命實不猶他安咎也齒孫於君忝有相識
之雅復叨同譜之誼恐君之志行湮沒爲世遺議故敢綜

其大概并得於君之友人莊先生浚家陸文學徽恩者略
爲甄次以植景行以表幽隱焉誄曰

先民有言禍福有門惟彼聖哲克明厥源匠披崑岡寸石
亦寶蘭生蓬中樵刈莫保同日被霜蔽者莫傷非彼明懿
庇之吉祥蔭於惡木爲雷所撲豈伊謬悠實貽僵覆非性
之哲乃遇之難表緇裸壤曩彥所嘆哀哀毛君獨罹此厄
身由茲殲名由茲裂猗歟毛君譜系煒燁於鐸烈祖顯明
中葉景堂有笏鑿楹有書世承崇軌耀光邑閭里傳清德
內行敦穆厥糠奉親然薪照讀日不兼食寒無襲衣負米
遠道削蒲石碣刻志崇學晨夕研究斧藻文淵鎔匠經圖
蘆簾風緊危櫺雪深孤檠冷飈破案寒侵鶴衣晝吟牛羈
夕宿雞號奉翰月落披牘歷二十年志不稍衰僉謂碩學
宜顯羽儀芹藻方歌蓼莪泣血一稔乍青麻衣如雪龍集

戊子 詔籲羣英舉君孝廉鹿莘乃賡嗚呼哀哉世殫志
學代濬崇基報君一第施亦云宏繼詞鏤肝刻藻鉤胃登
君賢書得不爲愧飫糲耐貧短褐耐冷卽雋鄉選遇不爲
倖年已逾壯常安潦倒卽捷文場亦不爲早如何穹昊忍
隆隆災鵬翮方運卽被摧頽毀君脩名貽君冤抑彼蒼者
天曷其有極列宿欲明浮雲蔽之冰鑑欲清凝塵翳之嗟
我毛君至性真純罹此弊俗磨而遂磷公車乍歸牘訟紛
起羣情擾擾挽我良士匿於戚屬眾爲促之辭而涕洟眾
爲速之疾流東回弱水亦折萬喙遙起蘇張卷舌暉暉日
月孰明我心光藻鏡孰鑒我忱俯首呈詞抑眉對簿遶
巡堂皇慚接伯伍時維盛夏炎廳煽途杲杲赤日朝涉夕
趨凋悴旣深冤抑縈結奄然晨簞殲我良傑嗚呼哀哉人
孰無死或遺令名唯君之卒并墮厥聲殉之以身已爲意

摧毀之以節胡云不哀嗚呼哀哉荒寒之隈霰雪所集墮
隤之區灌莽所宅一行之玷眾毀俱隨一日之失奕世莫
追羣士所譽冰崖可熱積流所詆純金可裂累若蠅矢乃
碎楚珩隙若蟻竅遂墮巖城世論詘詘惡直醜正矧予有
瑕授之以柄謂子利昏殛無餘資謂子智譎語無飾辭淪
然者川窈然者谷維子之疵百身莫贖嗚呼哀哉靈潛一
旦譽流萬年冥冥九京抱憾誰湔忝同里閭備聞故實世
有知者知非曲筆誰毀誰譽聖謨永存聊表幽德告君後
昆

諸授奉直大夫候補戶部主事李穎呂君哀誄

呂君諱振驥字季穎號絨三道光六年進士候補戶部雲
南司主事常州陽湖人也以道光十三年十二月初一日
卒年僅三十有六嗚呼哀哉山雪摛華荆璞遽毀豫柏挺

秀烈飄驟推薄宦甫營山邱旋慟入室而視惟存敝冠關
門而哭尙有老母孤兒三尺烏離轂而頽巢千里一棺孤
首邱而無日是可傷矣君裔出東萊望重南國代有隱德
楹臧斷編劬學篤於繩樞慧心出於髫齒寢挾鉛槧穿幼
安之藜牀口弊典墳從夏統於招圖蓋貧不廢業故飽糠
覈而亦甘敏且虛盅雖抱琬琳而自晦哲舅伯翔孝廉瓌
瑋博達當世傾衿君既得其師承益闢奧窔質疑義於琳
璣騰茂實於機雲二龍籟雲萬馬曄響故能摺囊百氏笙
簧六籍纂漢儒之微言精祭酒之訓故義文探祕埽輔嗣
之空談麟鼓搜奇補陸機之漏簡其沈思博識雖孝廉君
亦自謂不逮也少有至性內行清嘉十齡失怙廢蓼莪之
一編甘載養親少黍稷之百畝然藜藿自厭甘毳必供茅
容奉膳碩友見而心傾石建浣裘臧獲聞而感泣至其敬

事諸兄更推友愛聯牀聽雨驗大被之奇溫隔牖聞聲飭
衣帽而始荅候伯消於講席赤日盈途送玉局而出郊青
纓濯淚其孝弟有人所難及者矣迨夫文戰屢捷巍科早
登以通博之才與曹郎之選雲南司綜核天下財用鉤稽
繇劇君劬劬如畏絬絬竭忠文案自環竿牘無滯每見有
不合往往力爭篝鐙五夜人知李遜之功勤入座一言羣
慄蕭生之膽氣雖不克見其設施而居官之勤恪可知矣
嗚呼以君之經術湛深志行高邁家修則德媛曾閔服官
則勞同邵續上交有抗志之風退處無矯俗之意使得假
以遐年錫之隆遇所當顯絕特之梗概副知交之厚期者
也何期逸翮乍張中道徂謝攬轡欲騁而騏驥之步俄停
含香甫膺而蘭茝之華蚤落嘻其酷矣而況蘇韶永訣遺
轍遲歸李賀彌留阿嬰已老乞餘齡以將母九天之呼籲

莫間痛襁褓之遺孤三日之咳名未命嗟乎蕭寺魂羈家
山路遠空隸頭銜於尺旒未歸恆幹於泉塗京華旅殯卧
白骨而生悲長夜思歸瘞玉棺而無地哀哉齒孫與君交
深杵臼誼託葭莩應場拔藻久結隊於敦槃向生重來已
哀感夫鄰笛而哲舅復以誄言見屬遂得表茲素履用綴
元旒嗚呼虞歌執紼慟元伯之有靈寶劍遺阡弔徐君而
肩涕迴車三步待營雞酒於他年遺橐一面爲發蟬篇於
此日誄曰

猗與呂君力敦志節賈重璠璣德光前哲曾不中壽殲我
詰人崑邱碎壁凌門落鱗我初識君歲在乙酉君登賢書
我耕隴畝握手翩然惠休之室片語定交如舊相識白露
未晞秋琴始張牽襁讀畫子歌我觴素心兩三雲溪一曲
布驥若飛其人如玉歲聿云莫寒風襲裾子攜百錢飲我

城隅朗月不來詩袂乍舉狂談相對室忘其主春波畫舫
送君衡門離瑟慘臆林花說魂自茲一別死生契闊萍蓬
各飄風雨墜翼聞君拔藻九萬圖南俯首狂喜貽君一函
雪泥已分思見顏色山河迢迢不我能卽問君惡耗時客
汴州爲位而哭淚綆盈眸余入都時惟夏杪登君之堂
人琴俱杳敬問君母進謁哲昆門可羅雀親仍食貧遺文
在笥遺孤在抱眷念疇昔憂心如擣傷哉伯鸞未返桐棺
秋風夜起漆鐙穗寒我已脂車將歸故苑君其有知偕余
南反深囂淺學有酒如澠雲車風馬魂其式馮精爽或通
驪然道故勿以戢景謂余不覩偉文碩行舉世共推書君
樂範以貽後來

諸授中憲大夫山東督糧道加三級例晉通奉大夫伯淵
孫公墓表

嘉慶二十三年正月二十二日山東督糧道伯淵孫公卒於江寧祠屋以其年十二月十六日返葬於常州橫塘鄉祖塋諸孤藐然元石未立越十二年公子廷鑣廷鏞等始立闕元隧命其通家子洪麟孫爲文以表墓道公固海內所稱博學君子先府君梓曰交也名顯區宇績光彝常已上列史氏之文苑下徵文獻於州郡矣獨其剛折端志忘身忤權足以厲臣節激詭隨者世或未盡識之故特綜次大概俾立圓碣以式來禩焉公姓孫氏諱星衍字淵如世爲陽湖人乾隆五十二年進士及第歷官翰林院編脩刑部直隸司主事直隸司員外郎廣東司郎中山東兗沂曹濟兵備道山東督糧道卒年六十有六公之未遇時也與先府君交最善而淵量幽曠神崖自高陳仲舉之居室不翦蓬蒿孟叔達之負懷豈顧破甑益泥蟠未光而縱壑之

志已具矣及與先府君同入畢尙書沅幕府先生每陵厲一切訛議時事大將軍之揖客俱高任安蓋次公之酒狂不避丞相雖太傅愛士吐車茵而亦容而同列諸賢已艸檄而其逐一時目爲狂生不知公之介節自此著矣及入翰林值故相當軸招來世彥凡所盼飾悉奮霄漢素慕公材欲作羈繫爲將軍之府吏立致九卿得楊惔之片辭雲興五嶽公回翔冷署屏絕權要南陽在位松柏之志猶存參軍餞離風馬之緣不接卒之絳灌秉軸賈生淹其奇才蕭生抱關仲翁笑其寂守而公不顧也已酉散館改官主事故相猶欲屈公一見爲之奏請公曰吾寧得上所改官不受要人之惠也破琴拒使戴逵豈入王門案劍去官杜陵方爲男子彥回入室褚炤索火而燒車宵人授餐眞長對客而卻饋今之司直無愧古賢矣及官刑曹每援引

古禮平反核獄嘗有孝子爲父報仇殺役坐死其姑控部
謂孝子父實爲役逼斃請檢尸傷當道屬公致之死公曰
吾豈能以枉法殺孝子哉卒出其罪對宰相而抗爭九重
動色引國律以折佞列卿汗顏持正不阿皆此類也後以
觀察兼權臬事時有武弁犯法挾厚力求脫知公嚴陵不
可干因賄通故相致書浼解公訪得之械其使者於通衢
卒致武弁於法鍾廷尉免冠而請折以王章虞信陽郵書
乍來笞之百杖雷電可抗矧乎佞臣南山可移莫易此判
仲卿抗疏同列爲之寒心鮑恢觸邪貫戚囚之斂手公亦
緣是幾得嚴譴矣嗚呼巨浸煽海華嵩自形其確然逆颿
鼓山孤桐愈持其勁節舉世回迷獨好正直不有砥柱安
障洪流且夫尊國守法之謂忠忘己忤邪之謂直不畏疆
禦之謂勇不污聲利之謂絜公當權相秉鈞盈朝嬖阿獨

能孤特一概銜膽自厲埋輪都下抗當道之豺狼破柱私
門正刑章於梟獍關東觥觥發正氣於羣僚武嘉區區障
江河於一簣而世之刑疏甘辭者每謂質直足以構忤剛
毅足以飾禍然公之矢志節者至矣折佞人者銳矣卒之
屢蹈危機終焉允臧豈非遷蘭者枉淪於變鮑勁直者自
足以禦烈乎當公之與先府君同朝也每感忿朝事激揚
清濁及公以屢忤權貴幾絀吏議而先府君亦以違例上
書遣戍西陲矣故公爲先府君墓碑言先府君感激
聖
明指陳時政其書指斥朝臣之託迹權門罔上負國者凡
若干人嗚呼窺公之意其在斯乎其在斯乎齡孫童穉不
獲見公之大節僅讀公之年譜家傳及公所爲先府君墓
碑想見賢臣立朝之風範同志相勛之高誼取其微意以
表公阡使望之直節與嵩泰而並崇李膺勁風極萬代而

馬
瞻仰他若闕閤事蹟則有公家傳在不復綴云道光十一年十二月洪齋孫表

陸湘川先生墓表

吾鄉有隱君子二人一日鄒先生遵路一日陸先生湘川皆鄉閭之耆宿後雋所取式者也鄒先生者吾友處士澍之尊人日居肆廛操守卓苦嚴遵之卜肆不避囂塵百年之資生惟藉樵筭非機杼之物不以禦寒進松朮之餐亦必量腹澍通方書每爲里人治疾先生必日詢之見所治者多則喜動顏色偶有不治則戚然寡歡若隱痛之在躬者嗚呼葉陽陋巷如懷渴饑隣之仁心施及妯娌憂樂關乎一室德施覃乎後昆矣然誠訥寡言若無可稱述者而陸先生之名尤著焉陸先生諱峻忠宣公贊三十三世孫吾友文學黻恩尊人也少日嘗幕遊四方挾厚貲注籍縣

佐瀕得官矣陸賈使粵曾豎千金之裝陶公折腰行種五畝之秫乃忽閉戶不出敎授子弟梅福棄官爲門卒於吳市文長歸去齧胡餅於成都性尤嚴正居一室之中肅若朝典規後進之失迅如雷霆至其好行陰德則負郭之田人呼爲續命累世之券獨燔而不存尤里黨所矜式者矣兩先生操行不同亦未嘗相遇從然鄉人之愛慕兩先生者無異詞亦無人不以隱君子目之也余嘗讀漢書慕鄭子真嚴君平之爲人以其可以激貪砥俗及進考兩人行誼則寂寥數言而已心竊疑之不謂於鄉先生得之也至若符融許劭諸賢前皆辟功曹掾吏矣後忽高蹈冥鴻矢志巖岫當世誠未易覲其人也而陸先生有焉則鄉人之所以稱兩先生者不亦允乎麟孫初未得識兩先生及與嵩及徽恩訂交乃得謁兩先生於里第每御輪撰屨若有

餘榮蓋麟孫自幼孤露不克奉先人庭訓故凡遇鄉邦之耆舊知交之尊宿未嘗不願脩後進之儀撰泉明之杖以想見老成之典型父執之風範焉及前歲鄉先生卒今春先生又卒而麟孫亦於去秋丁慈母憂矣嗟乎飛星兆識南州則高士俱亡蓼莪廢篇北堂則蘭膳已徹麟與澍等三人無日不斬焉衰絰相對泣然帷堂則巷哭俱聞蒿里則衣冠盡白余及黻恩復遠去倚廬饑驅奔走馬鬣乍營葛屨載道嗚呼哀哉故表先生之遺行不禁感靈光之頽復觸風木之慘執簡悲來不自知涕之何從也先生以道光十二年正月二十三日某時卒春秋七十有一以其年某月某日葬於某鄉某原子二人黻隆黻恩以先生窀穸有期貽書麟孫乞爲表墓余惟以兩先生皆鄉邦所敬式者也故因黻恩之請而并書之俾揭諸阡以告鄉人焉鄉

先生名某享年六十

先賢吳學士祠版文

吾鄉靈粹鍾異名賢代生然以直諫顯者里乘闕寂自道
鄉箸讜議於宋廷學士建光節於明葉遼闊千載華嵩並
峙可見骨鯁之臣尤往哲所罕觀者也蓋烈士不惜其踵
頂故能蹈鼎鑊而如節賢者不拘於小義乃克顯正氣於
宇宙故履忠作孝者不顧瑣瑣之世議抗志求仁者惟知
嶽嶽之大節也然而神鯁搏海難辭尺鷃之譏豫章翳天
每罹掘閔之憾睢陽偉烈史臣不無微辭武鄉蓋臣崔浩
加以目論若公之大節則尤可言焉公固江陵相門下士
江陵以奪情起復公上疏斥之當時所謂六君子也論者
謂魏倩登進賴鄧侯爲先游黃霸入官實夏侯爲口薦江
陵公之座師也漢廷賢杰每爲舉主而服喪第五曲躬必

對鄭宏而致禮在三之義鉅典攸關公乃忘卵翼之舊恩
 作鴟鴞之反噬是袁氏樹恩未收獲稷之報臣俱仕衛先
 排文子之疵未免崔羣報怨竟下同陸氏之荒莊卽令羿
 罪貫盈何得殛逢蒙之鳴鏃不知匪躬而建讜節者公誼
 也拔擢而感知遇者私恩也江陵而不顧大慝卽挂彈章
 公之背德也江陵以固位遺親得罪名教公不可不言也
 君子愛人不以姑息爲德君父有過自可號泣而言況詳
 觀疏奏究厥指歸固止曲望其奔喪未忍顯揭其隱隱安
 得妄隨羣議卽肆詆譏乎說者又謂公以春官之桃李傷
 董相之門牆何妨徑造東堂陳言前席是則彭宣帳後可
 片語而轉圜詎必廣德免冠發狂言以激忿乎不知孔光
 固位惟有熱衷吳起絕裾已無至性方結黃門之媼相涕
 泣畱賢通白簡之庸臣飛章借寇朱雲下殿知爲張禹而

鳴威執友入言則效侯嬴而勿頸而謂能以造膝之一言
解柄而歸田乎公之明哲固深鑒其隱衷矣未解斯言從
何鼓吻也至謂江陵相業大造明邦漢得子孟是以中興
晉有謝安居然再造是以王尊叱馭益顯公忠子文毀家
方紓國難卽其有玷於彝常要自無關於民社如茲曲說
更屬謬悠夫阿衡佐毫不間生自空桑申生有言天下誰
無父母未有行負神明而克樹偉鉅者也且或當龍髯墮
弓之日鳳展委裘之年龜鼎未安或堪藉口今萬厯紀年
已十餘載矣春秋鼎盛帝非六尺之孤童聖慈垂簾上有
西岐之文母則金甌無缺坐鎮無藉於姬文玉弩不驚往
制難援夫兵革而乃骨肉未寒黃扉高坐冠禮則朱紱垂
紳大婚則彤裳班位沐浴佩玉祁子見之而傷心食稻衣
錦宰我安之而若素誰非人子而忍爲是言乎又謂當江

陵之奪情也眾正盈朝諫章鱗萃艾穆旣抗聲於殿陛鄒
趙復接武於青蒲公卽緘默大義亦申嗚呼列星麗天不
因圓靈而斂采五音合樂不緣金奏而嚟聲使謂蹇蹇直
節志士甘以後人謬謬滿廷諍臣不妨卷舌是有微箕之
抗義墨胎卽不必餐薇有袁粲之死忠褚淵自可以屈節
此固洪選之膺膺非賢者之所爲也至謂江陵戀棧居寵
而忘親延陵徇名背師而沽直揆之名義厥戾維均則又
不然江陵挾閹尹以震主卻苦寢而固榮欺死父於九原
非滌肝於王室有慙子鵠兼愧相箴公則委曲求全純忠
自表以爲委蛇非所以事主附曲非所以報師必挈魁柄
以歸黼座則主威尊矣感烏傷以植人紀則師誼盡矣且
夫盡臣之戴主也以全國體爲大君子之報德也以勛至
行爲先使江陵當日卽撫膺悔悟灑泣奔喪則識棧而退

不必效主父之逆施大慝未章何至糾王光之響牘是大
節純矣博陸驂乘必無忒刺之嫌蕭生乞骸豈罹犴狴之
慘是知遇全矣且使君臣交契謗書不行則純忠篆碑詎
至鴟詩之毀室模金範象何傷烏喙之寡恩是國家亦無
遺議矣嗚呼公所以感悟聖聰者至焉公所以酬德師門
者隆焉故難格者神祇也公則精誠冥通幽感斯應廷杖
之日迅雷殷空庶女排闥寒霜滲乎燕郊烈士播詞陰雲
解乎衡岳公之忠可知矣不測者君威也公則謹言沃心
宸旒寤合斥逐未幾旋復召用折檻永存漢帝爲之動色
良匠引喻英辟爲之霽威公之忠可知矣至難愜者庶類
也公則聲播寰宇婦孺感泣玉墀有贈察衆服其剛腸遺
疏殺青頑懦讀而奮立公之忠又可知矣豈謂誠可以貫
天日而不能懾含生性可以格九重而不可以愜庶士志

可以白萬古而莫逃里儒之刻繩此所以波皆而歎息者乎道光十一年公裔孫敬承將新家廟授簡齋孫以銘祠版齋孫直臣之後也昔先府君未遇時曾與袁太史枚論公志節往復數書後以違例上書受知聖代論者以爲當時辨論有深契焉惜集中失編其文久佚故於敬承之請詳備書之告後世焉嗟乎一日之論難馳域外之觀志義常申永作山河之氣論公者可以思矣

祭養一先生文

嗚呼茫茫大圓陶鈞九區越數百載挺生大儒如漢代之馬鄭如唐宋之歐蘇匯羣流於溟海銘萬物於鴻鑑筆補造化理追睢盱矧熙朝之樸學與西京而並驅遠溯乎顧閭江惠近推乎邵戴錢盧延一綫之絕業應名世而非誣將俎豆於來禋視千古如須臾則其一身之存沒固關

系乎文運之顯晦而非特恆榦之榮枯猗歟先生待後守
先雄峙壇坫垂五十年初弁冕於秋賦旋樹望於木天南
孤秉筆東馬陳編螭坳簪筆鳬鳥飛仙若霖雨之澍物迴
秋瘠於春妍頌袁安於萬口選劉寵之一錢欲嘉惠夫後
進遂早賦平歸田先生之學躋峰冠極發洪河之渾茫據
泰華之嶽萃七略九流融貫爲一周孔微言服賈經術管
樂稔期范韓識力苟坐言而起行徧兆姓而食德僅閉戶
而著書猶神蚪之蠖屈發爲文詞地負海涵千辟萬灌至
理醺醺使曹劉而卻步令鮑謝而汗顏布帛菽粟色淡味
甘若班若馬庶幾竝參至虛懷而愛士更一本以至誠如
饑渴之甘飲食如雨露之大裁成郭泰人倫之鑒汝南月
旦之評死者殫其遺軀生者勛以令名雖片長與薄技必
商榷而權衡指春申之故虛緬君山之古麓鄉名鄭公地

號愚谷池蓮墮紅帶艸舒綠書擁百城碑拓千軸旣載酒
而偕來咸投轄而止宿辨難縱橫壺觴相屬剖析羣疑脫
略邊幅日百函而置驛宵頻起而剪燭冀靈光之巋然表
士林之芳躅歲厄龍蛇咎徵鴛鴦酒空北海之尊聲慘西
州之哭嗚呼先生壽躋七秩名播千秋惠澤數乎民物欽
仰徧於遐陬卽休神於太素固無憾於山邱惟禮堂之簡
未定濟世之願未酬覩梁木之旣壞共雪涕而難收況李
郭之世交仰河汾之師表提挈孤寒殷拳古道識陽元於
陋巷拔孝相於傭保假倦禽以羽翼被朽株以文藻酬德
無從人琴俱杳誰憐爨下之桐空岬茂陵之稿嗚呼東里
子產明明有言夫子而死吾其已焉痛潁川之殘客哀隨
武於九原山陽知己之賦蘭成思舊之篇藉有窮之縑素
寫忱悃而涕漣冀靈旗之返駕遂恪薦於雕筵

國朝常州駢體文錄卷第八